



藝
海
珠
塵

14
1627
17



門 44
號 1627
卷 17



藝海珠塵

集部別集類

南 滙 吳 省 蘭 泉 之 輯

海 鹽 周 蘭 枝 瀛 三 校

岳忠武王集

岳 飛 簞 簡里詳附本傳

原叙

吾徒屏跡町廬流覽史冊恒遇千古忠邪之林國家存亡之故未嘗不臨卷興懷愴然欲絕也粵考往蹟忠誠天植狗國泯軀自關漢壽公而下若睢陽常山指未勝詘顧使人聞風悲憤灑涕裂眚莫若趙宋岳鄂王之事

藝海珠塵

岳忠武王集



豈非王忠孝大節貫日月泣鬼神乃至罹巨奸之酷毀
垂成之功抑異於授命疆旅致歎時數者哉當思陵御
札頻頒寢閣載命詎不知恢復之圖匪異人任一旦入
繆狼之計自墮長城論者謂淵聖南轅黃屋非吾有也
矧黃龍直擣或有劉裕滅秦歸篡之憂雖小朝廷奚可
得斯皆帝意中事檜遂建議逢合忍輕社稷蠟書徒馳
竟成三字之獄由今觀之卽其說豈盡誣耶迨乎鍛鍊
旣成從容就義韓何寃之而弗聞於上三大理士儂劉
允升諸君子訟其寃而上弗察王雖志抱餘憾乎假令
王不奉班師之詔僥倖成功有如後之妄議者王以爲

憾乃滋甚故勿爲耳王一死誠可無憾惟宋室偏安卒
至版宇日感中華淪喪而莫可如何此仁人志士讀其
書論其世所爲太息於陰陽小大之間而徬徨天人之
際也王少力學好左氏春秋有闕漢壽風漢壽自一二
牋牘外撰著罕傳而王所爲表劄詩記沉摯壯涼能自
寫浩然之氣又與武侯出師二篇相上下余故採程史
諸書所載哀次錄存之庸繫千百載忠孝仰止之懷他
若遺言佚事雜見於金陀粹編及精忠諸錄率多瑣復
又後賢憑弔之作竊嫌掛漏並缺弗存觀者尚毋嗤其
未備云時崇禎十一年戊寅八日單恂題於東臯之白

燕庵

南京上高宗書畧

陛下已登大寶黎元有歸社稷有主已足以伐虜人之謀而勤王御營之師日集兵勢漸盛彼方謂我素弱未必能敵正宜乘其怠而擊之而黃潛善汪伯彥輩不能承陛下之意恢復故疆迎還二聖奉車駕日益南又令臨安維揚襄陽準備巡幸有苟安之漸無遠大之畧恐不足以係中原之望雖使將帥之臣戮力於外終亡成功爲今之計莫若請車駕還京罷三州巡幸之詔乘二聖蒙塵未久虜穴未固之際親帥六軍迤邐北渡則天

威所臨將帥一心士卒作氣中原之地指期可復

招曹成不服乞進兵劄

竊惟內寇不除何以攘外近郊多壘何以服遠比年羣盜競作朝廷務廣德意多命招安故盜亦玩威不畏力強則肆暴力屈則就招苟不畧加勦除蠶起之衆未可遽殄臣昨者被奉曹成之命深以爲陛下好生之意如此爲臣子者患不能推廣而行之故先宣布上恩以期改行閱日雖久扞格是聞臣常累遣探報知其賊馬已離道州進趨廣西此寇所爲未肯遽屈意欲侵犯二廣肆毒生靈俟其力盡勢殫然後徐爲服降之計臣今進

發自郴州桂陽監以往卽行措置用兵掩殺速除蕩以
綏彼民

乞復襄陽劄

竊惟善觀敵者當逆知其所始善制敵者當先去其所
恃今外有北虜之寇攘內有楊么之竊發俱爲大患上
軫宸襟然以臣觀之楊么雖近爲腹心之憂其實外假
李成以爲唇齒之援今日之事正當進兵襄陽先取六
郡李成不就繫縛則亦喪師遠逃於是加兵湖湘以殄
羣盜要不爲難而况襄陽六郡地爲險要恢復中原此
爲基本臣今已厲兵飭士惟俟報可指期北向伏乞睿

斷速賜施行庶幾上流早見平定中興之功次第而致
不勝天下之幸取進止

畫守襄陽等郡劄畧

陛下欲駐大兵于鄂州則襄陽隨郢量留軍馬又于安
復漢陽亦量駐兵兵勢相援漕運相繼荆門荆南聲援
亦已相接江淮荆湖皆可奠安六州之屯且以正兵六
萬爲固守之計就撥江西南湖兩糧斛朝廷支降券錢爲
一年支遣候營田就緒軍儲旣成則朝廷無餽餉之憂
進攻退守皆兼利也惟是葺治之初未免艱難必仰朝
廷微有以資之基本旣立後之利源無有窮已又此地

夏秋則江水漲隔外可以禦寇內足以運糧至冬後春
初江水淺澀吾資糧已備可以坐待矣於今所見在乎
速備糧食測量屯守之兵可善其後臣識闇不學輒具
管見仰報聖問辭拙事直伏乞聖慈裁決

乞出師劄

臣伏自國家變故以來起於白屋實懷捐軀報國復讐
雪恥之心幸憑社稷威靈前後相立薄効而陛下錄臣
微勞擢自布衣曾未十年官至太尉品秩比三公恩數
視二府又增重使名宣撫諸路臣一介賤微寵榮超躐
有踰涯分今者又蒙益臣軍馬使濟恢圖臣實何人誤

辱神聖之知如此敢不晝度夜思以圖報稱臣揣敵情
所以立劉豫於河南而付之齊秦之地蓋欲荼毒中原
生靈以中國而攻中國粘罕因得休兵養馬觀釁乘隙
包藏不淺臣不及此時稟陛下睿算妙畧以伐其謀使
劉豫父子隔絕五路叛將還歸兩河故地漸復則金賊
詭計日生宅時浸益難圖臣愚欲望陛下假臣日月勿
復拘臣淹速使敵莫測臣舉措萬一得便可入則提兵
直趨京洛據河陽陝府潼關以號召五路叛將則劉豫
必捨汴都而走河北京畿陝右可以盡復至京東諸郡
陛下付之韓世忠張俊亦可便下臣然後分兵濬滑經

五
畧兩河劉豫父子斷可成擒如此則金賊有破滅之理
爲陛下社稷長久無窮之計實在此舉假令汝穎陳蔡
堅壁清野商於虢洛分屯要害進或無糧可因攻或難
於餽運臣須斂兵還保上流賊定追襲而南臣俟其來
當率諸將或挫其銳或待其疲賊利速戰不得所欲勢
必復還臣當設伏邀其歸路小入則小勝大入則大勝
然後徐謀再舉設若賊見上流進兵併力來侵淮上或
分兵攻犯四川臣卽長驅擣其巢穴賊困於奔命勢窮
力殫縱今年未盡平殄來歲必得所欲亦不過二三年
間可以盡復故地陛下還歸舊京或進都襄陽關中惟

陛下所擇也臣聞興師十萬日費千金邦內騷動七十
萬家此豈細事然古者命將出師民不再役糧不再籍
蓋慮周而用足也今臣部曲遠在上流去朝廷數千里
平時每有糧食不足之憂是以去秋臣兵深入陝洛而
在寨卒伍有飢餓閃走故臣急還不遂前功致使戰地
陷僞忠義之人旋被屠殺皆臣之罪今日唯賴陛下戒
敕有司廣爲儲備俾臣得一意靜慮不爲兵食亂其方
寸則謀定計審仰遵陛下成算必能濟此大事也異時
迎還太上皇帝崇德皇后梓宮奉邀天眷歸國使宗廟
再安萬姓同歡陛下高枕無北顧憂臣之志願畢矣然

後乞身還田里此臣夙昔所自許者伏惟陛下恕臣狂
易臣無任戰汗取進止

乞本軍進討劉豫劄

逆豫逋誅尚穴中土陵寢乏祀皇圖偏安六飛時巡越
在海際天下之愚夫愚婦莫不疾首痛心願得伸鋤奮
挺以致死於敵而陛下審重此舉累年于茲雖嘗分命
將臣鼎峙江漢僅令自守以待敵不敢遠攻而求勝是
以天下忠憤之氣日以沮喪中原來蘇之望日以衰息
歲月益久汙染漸深趨向一背不復可以轉移此其利
害誠爲易見臣待罪闕外不能宣國威靈克殄小醜致

神州隔於王化虜僞穴於宮闕死有餘罪敢逃司敗之
誅陛下比者寢閣之命咸謂聖斷已堅何至今日尚未
決策北向臣願因此時上稟睿算不煩濟師止以本軍
進討庶少塞鰥官之咎以成陛下寤寐中興之志順天
之道因民之情以曲直爲老壯以順逆爲強弱萬全之
效茲焉可必惟陛下力斷而行之不勝大願

乞進屯淮甸劄

伏覩陛下移蹕建康將遂恢圖之計近忽傳淮西軍馬
潰叛鄴瓊等進脅軍民而去然事出倉卒實非士衆本
心亦聞半道逃歸人數不少於國計未有所損不足上

軫淵衷臣度今日事必彼未能便有舉動襄陽上流目
卽亦無賊馬侵犯唯是淮甸迫近行在臣願提全軍進
屯萬一叛偽窺伺臣當竭力奮擊期於破滅仍乞別遣
軍馬措置襄陽一帶伏乞睿斷詳酌施行

乞乘機進兵劄

金賊近累敗衄其虜酋四太子等令老小渡河惟是賊
衆尚徘徊於京城南壁一帶近却發八千人過河北此
正是陛下中興之機乃金賊必亡之日若不乘機殄滅
恐貽後患伏望速降指揮令諸路之兵火急並進庶幾
早見成功

乞移都奏畧

錢塘僻在海隅非用武之地臣請陛下建都上游用漢
光武故事親率六軍往來督戰庶將士知聖意之所向
人人用命臣當仗國威靈鼓行而前殄滅此虜則中興
之功卽日可冀

論虜情奏畧

金虜自靖康以來以和款我者十餘年矣不悟其詐受
禍至此今復無事請和此殆必有肘腋之虞未能攻犯
邊境又劉豫初廢藩籬空虛故詭出此耳名以地歸我
然實寄之也臣請量帶輕騎隨二使祇謁陵寢因以往

觀敵釁取進止

乞定儲嗣奏畧

今欲恢復必先正國本以安人心然後陛下不常厥居以示無忘復讐之意

乞止班師詔奏畧

契勘金虜重兵盡聚東京屢經敗衄銳氣沮喪內外震駭聞之謀者虜欲棄其輜重疾走渡河況今豪傑嚮風士卒用命天時人事強弱已見功及垂成時不再來機難輕失臣日夜料之熟矣惟陛下圖之

乞以明堂恩補張所男宗本奏

竊見張俊例初除太尉陳乞奏薦男子文資內安排臣技能蔑取勳伐無聞遭際聖明承乏將帥伏念臣昨於建炎初因上書論事罪廢偶幸逃死實出聖造于此孤子一身狼狽羈旅因詣招撫使張所一見與臣言兩河燕雲利害適偶契合臣自白身借補修武郎閣門宣贊舍人充中軍統領尋又陞統制其後張所軍次北京蒙朝廷貶責南方卒以節死臣念靖康以來奮不顧身為國捍難者不為無人而其間誤國敗事者固亦不乏然聖恩寬大終於一切矜貸若張所先意兩河而身未北渡已遭橫議令其身名凋喪後嗣零落使臣不言臣則

有負欲望矜憐將臣今歲奏薦恩例奏補張所男宗本
依張俊例於文資內安排謹錄奏聞

辭鎮南軍承宣使第三奏

榮命下頒驚魂頓失辭章上達帝命不俞雖臣受之不
慙恐輿情之未協輒陳懇悞方切憂惶復蒙天語之丁
寧告戒備至愈使臣心之感戴進退靡安敢事虛辭仰
違明詔竊念臣將天威而遠討致賊巢之一空妙策奇
謀悉遵聖訓破堅却敵咸得士心臣實何能輒膺殊賞
既慙過量復付重權是誠叨冒以踰勲非謂謙辭而避
寵况九江乃控扼之重地連武昌爲襟帶之要衝用得

其人周瑜所以敗曹公于赤壁禦失其策隋何所以取
黥布於滌江難使非才濫膺此寄伏望吝此嚙喉之付
以屬大臣俯從螻蟻之誠使安愚分所有土伴恩命乞
賜寢罷干冒天威死有餘罪謹錄奏聞伏候敕旨

乞侍親疾劄

臣輒具危懇仰瀆睿聰臣愚戇之迹奮身單微初無尺
寸之先容獨賴聖明之特眷雖捐軀致命曾不足以仰
酬恩遇之絲毫思報之心寧有窮已臣近者奉命收復
襄漢去家遠涉六月餘日臣老母姚氏年幾七十侵染
疾病連月未安近復腿脚注痛起止艱難別無兼侍以

奉湯藥人子之心實難安處伏望聖慈察臣悃悞無他規避慙乞許臣在假以全侍奉之養將本軍人馬權暫令統制官王貴張憲主管候臣老母稍安依舊管幹職事恭聽驅策結草銜環誓圖報效冒犯雷霆之威臣無任戰懼激切之至取進止

辭建節第四劄

念臣猥以不才幸蒙委使敢謂涓埃之效遽叨旄節之榮若不屢辭干瀆天聽不惟叨冒寵榮不遑安處方今戎馬侵擾而誤恩若加於人深慮名器不重勸賞不實何以厭服公議臣雖三貢丹誠宸衷未允敢望聖慈察

臣之愚直非矯飾所有告命見在鄂州軍資庫寄納伏乞特賜追還以安愚分取進止

乞終制劄

伏念臣孤賤之迹幼失所怙鞠育訓導皆自臣母國家平燕雲之初臣方束髮從事軍旅誓期盡瘁不知有家自從陛下渡河以來而臣母淪陷河朔凡遣人一十八次始能般挈得脫虜禍驚悸至疾遂以纏綿臣以身服戎事未嘗一日獲侍親側躬致湯藥之奉今者遭此大難荼毒哀苦每加追念輒欲無生而陛下恩眷有加卽命起復在臣么微固深銜戴然臣重念爲人之子生不

能致菽水之歡死不能終衰經之制面顏有覲天地弗容且以孝移忠事有本末若內不克盡事親之道外豈復有愛主之忠臣已般挈扶護前來欲於江州或南康軍界營葬伏望聖慈矜憐餘生許終服制取進止

辭開府劄子貼黃

臣待罪二府理有當言不敢緘默夫虜情奸詐臣於面對已嘗奏陳切惟今日之事可危而不可安可憂而不可賀可以訓兵飭士謹備不虞而不可以行賞論功取笑夷狄事關國政不容不陳初非立異於衆人實欲盡忠於王室欲望速行追寢示四夷以不可測之意萬一

臣冒昧而受將來虜寇叛盟則似傷朝廷之體仍望以此貼黃留中不出保全臣子臣不勝至情伏乞睿照

辭開府第三劄

近者累犯天威力辭恩寵庶幾陛下燭危懇終賜矜從而溫詔諄諄未回睿聽跼地籲天不知所措夫爵賞者人君所以爲厲世磨鈍之具人臣得之所以榮耀鄉里而顯貴宗族也誰不欲貪多而務得哉然得所當得固以爲榮受所非受反足爲辱伏念臣奮迹羈單被恩優腆使臣終身只守此官已踰涯量豈可分外更冒顯榮遂速顛隲雖陛下推天地至寬之量在所兼容而微

臣抱金石圖報之心寧無自愧所有臣爲將不效獻言
守理之實臣於累奏中固已縷陳更不敢諄復紊煩聖
聽伏望陛下檢會臣累次劄子追寢成命特降俞旨庶
使微臣少安愚分

辭開府第四劄

臣已三貢辭章出於誠惻冒犯天威罪不容赦聖恩廣
大一賜溫詔兩降劄命捫心揣分感極涕零伏念臣草
茅固陋備數戎行曾無尺寸之功仰報天地之德竊以
開府之位實預孤卿之貴所以賞有功而進豪傑也如
臣何人輒膺斯秩是以心不自安終難冒受不避譴誅

再伸前懇非敢徒爲辭遜伏望聖慈矜察愚衷收還成
命庶令臣少安愚分臣不勝虔祈俟命之至取進止

辭宣撫副使劄

臣近叨受招討使不容牢辭又蒙聖恩授以前件差遣
切念臣一介寒賤誤膺器使顧土宇恢復之迹未見尺
寸而厚恩醲賞涯分已踰且以宣撫之重名實寄專征
之大事自非廊廟近臣勳伐高世者豈當冒躡而居異
時付託失人或誤驅策雖粉臣骨曷足以謝陛下兼招
討使權不爲不重若更加以甚高非常之寵必起負乘
斯奪之悔所有宣撫副使恩命實難祇受伏望追寢誤

恩庶安愚分臣無任悚懼恭聽宸命之至取進止

乞解軍務第二劄

臣頃以多病易衰仰瀆宸聽乞退處邱壠以便養疴伏蒙陛下未忍棄去尚闕俞音不免控瀝肺肝再摠悃悞今賢能輩出才智駢臻干城心腹之士可付以軍旅者類不乏人則臣之所請無邀君之嫌今講好已定兩宮天眷不日可還偃武休兵可期歲月臣之所請無避事之謗臣不揆庸愚幸免此二事止以疾病餘生恐誤任使久享厚祿坐費太倉蚤夜以思身不遑處所以不避鈇鉞至于再而不已伏望陛下垂溥照之明回益高之

聽曲加仁惻洞照愚衷使一夫之微終遂其欲特許退
休就醫醫藥

辭男雲特轉三官劄

臣聞君之馭臣固不吝於厚賞父之教子豈可責以近
功臣昨恭依睿算與賊決戰於陳穎之間雲隨行迎敵
雖有薄效殊未曾立到大功遽超橫列仍領郡防賞典
過優義不遑處所有誥命臣不敢令雲祇受伏望聖慈
俯垂天鑑追還異恩庶使雲激厲懦庸別圖報效取進
止

辭男雲轉三官第二劄

伏念臣本以凡材誤蒙陛下付以方面若臣不能與士卒一律則亦不能整齊其心昨者之戰士卒冒犯矢石有斬將陷陣立奇功者臣方列上事狀得霑一級而男雲何從超進崇資臣正恐士卒有無功之謗陛下致濫予之譏且陛下方謹惜名器以磨勵天下將昭復大業而乃因臣私恩廢公議臣不自安伏望聖慈特降睿旨收還上件恩命臣父子幸甚取進止

辭男雲特轉恩命劄

臣聞惟名與器不可以假人故循守資格自有常法必有非常之功而後有非常之賞如臣男雲始就義方尚

存乳臭雖累經於行陣曾未見於事功比者仰蒙聖恩曲垂異眷超資躡等驟進官聯不惟使雲志氣怠惰而臣益切滿盈之愧况臣既已仰竊國恩致身顯仕固有僥冒之名矣今併與其子而僥冒其可乎伏望陛下揭離照之明體乾健之斷特賜睿旨追還告命庶使雲粗知官爵之難得勉力學業他日或能備效驅策受之未晚取進止

辭男雲特轉恩命第二劄

臣聞正已然後可以正物自治然後可以治人臣奮身疎遜冒國寵榮陛下誤恩擢置重任以辱陋之資將軍

旅之衆顧惟匪稱夙夜惶懼惟恐檢飭修省有所未至
不足以服衆比者男雲未嘗立功遽遷優秩在臣私分
實不遑處臣庸懦無能方將勉竭駑鈍仰圖報稱而自
使其子受無功之賞則是臣不能正已而自治將何以
率人哉伏望陛下憐臣拙直察臣愚衷早賜俞音收還
成命容臣他日更立戰功然後命之以官亦未爲晚
所有官告一軸除已令本司簽廳牒鄂州於軍資庫寄
納外取進止

辭少保第三劄

臣聞忠臣之事君計功而受賞量力而受官不爲苟得

以貪爵祿况師旅方興事功未著臣方同士卒之甘苦
明將佐以恩威冀成尺寸之功仰報君父之德豈可身
被厚寵而恣然不以當鋒刃冒矢石者爲心哉所有少
保恩命臣實不敢祇受伏望陛下日月照臨乾坤覆載
察臣肺腑追寢異恩臣願憑陛下雷霆之威託宗廟山
嶽之福罄竭駑鈍期效涓埃俟將來功績有成臣將拜
手稽首祇承休命矣誠懇迫切至於再三瀆天威臣
不任戰悸恐懼之至取進止

辭少保第四劄

臣聞爵以馭其貴祿以馭其富爵祿者人君馭天下英

豪而使之貴富也人孰不欣受而願享之然名器假人
爲傳所譏無功受祿爲詩所刺則君不可以輕予臣不
可以妄受臣性資樸魯久叨寵榮每懼滿盈弗克負荷
况乃孤卿實爲異恩若更無功輒有貪冒臣賦分謏薄
竊恐別招譴責伏望陛下憐臣懇特降俞音追還恩
命庶使臣稍安愚分別效寸長仰報陛下天地生成之
德干冒鈇鉞伏候敕旨

辭少保第五劄

臣之事君義無有已若夫貪慕爵祿務榮一身而不以
國家爲念則非臣之所忍爲也比者羯胡敗盟再犯河

南之地肆爲殘忍人神共憤臣方將策駕礪鈍冀效尺
寸以報陛下天地生成之德今則虜騎寇邊未見殄滅
區區之志未效一二臣復以身爲謀惟貪爵祿則誠恐
不足爲將士之勸而報恩無所萬誅何贖伏望睿慈追
寢成命特賜俞音姑詔有司留以爲異時涓埃之賞取
進止

辭男雲除御帶第二劄

竊以御帶之職至近冕旒非有干城之才可以任腹心
之寄者不足以當其選臣男雲年少蠢愚殊未練達世
務一旦驟遷此職實非駭勿所能陛下爲官擇人豈當

出此知子者父誠不違安不免披露愚誠再干天聽

乞敘立王次翁下第二劄

臣契勘參政與樞副敘位朝廷自有定例豈可爲臣忝竊孤卿敘位使在參知政事之上不免再具誠懇仰瀆聖聽伏望睿慈曲垂昭鑑許臣只依近例敘位在參知政事之下庶使庸愚不致僭越取進止

乞解樞柄第三劄

露章待罪自驚寵數之過優溫詔示恩猶闕俞音之下逮再陳愚懇仰瀆淵聰伏念臣濫廁樞庭誤陪國論貪榮滋甚補報蔑然豈惟曠職之可憂抑亦妨賢之是懼

冀保全於終始宜遠引於山林伏望聖慈察其誠心實非矯飾速降睿旨許罷機政取進止

解除兩鎮充萬壽觀使第二劄

竊以兩鎮節旄國朝盛典非有大勳豈容輕授臣前此叨據常懼弗稱自惟智術短淺坐糜歲月攷其績用初無絲毫安可更爾冒榮矧內祠之任得侍清光朝廷所以貴老尊賢用昭異數在臣愚分非所宜處顧待遇之愈隆夙夜以思雖粉身碎骨何以圖報萬一愧深汗溢感極涕橫重念臣才疎德薄人微望輕若不自列濫當優寵必致顛躓上孤宸眷欲望聖慈追寢成命除臣一

在外宮觀差遣取進止

謝講和赦表

臣岳飛上表言今月十二日准進奏院遞到赦書一道臣已卽躬率統制領將佐官屬等望闕宣讀訖觀時制變仰聖哲之宏規善勝不爭實帝王之妙算念此艱難之久姑從和好之宜睿澤誕敷輿情胥悅臣飛誠懼誠忭稽首頓首竊以婁欽獻言於漢帝魏絳發策於晉公皆盟墨未乾顧口血猶在俄驅南牧之馬旋興北伐之師蓋夷虜不情犬羊無信莫守金石之約難充谿壑之求圖暫安而解倒垂猶之可也顧長慮而尊中國豈其

然乎恭惟皇帝陛下大德有容神武不殺體乾之健行與之權務和衆以安民乃講信而修睦已漸還於境土想喜見於威儀臣幸遇明時獲觀盛事身居將闔功無補於涓埃口誦詔書面有慙於軍旅尚作聰明而過慮徒懷猶豫而致疑謂無事而講和者謀恐卑辭而益幣者進臣願定謀於全勝期收地於兩河唾手燕雲終欲復讎而報國誓心天地當令稽顙以稱藩

奉詔移偽齊檄

契勘偽齊僭號竊據汴都舊忝臺臣累蒙任使是宜執節效死圖報國恩乃敢背棄君父無天而行以祖宗涵

養之澤醜爲讐怨率中華禮義之俗甘事腥羶紫色餘
分擬亂正統想其面目何以臨人方且妄圖襄漢之行
欲窺川蜀之路專犯不韙自速誅夷我國家危運已銷
中興在卽天時旣順人意悉諧所在皆賈勇之夫思共
快不平之忿今王師已盡壓淮泗東過海沂驛騎交馳
羽檄疊至故我得兼收南陽智謀之士提大河忠孝之
人仗義以行乘時而動金洋之兵出其西荆湖之師繼
其後雖同心一德足以吞彼國之梟羣然三令五申豈
忍殘吾宋之赤子爾應陷沒州縣官吏兵民等元非本
意諒皆脇從屈於賊威歸逃無路我今奉辭伐罪挾瀾

蘇枯惟務安集秋毫無犯倘能開誠納款肉袒迎降或
願倒戈以前驅或列壺漿而在道自應悉仍舊貫不改
職業盡徐戎索咸用漢條如或執迷不悟甘爲叛人嗾
桀犬以吠堯詈獵師而哭虎議當躬行天罰玉石俱焚
禍並宗親辱及父祖掛今日之逆黨遺千載之惡名順
逆二途蚤宜擇處兵戈旣逼雖悔何追謹連黃榜在前
各令知悉

御書屯田三事跋

臣聞先正司馬光有言德勝才謂之君子才勝德謂之
小人論人者能審於才德之分則無失人矣曹操募百

善後珍屠
姓屯田許下所在積粟諸葛亮分兵屯田而百姓安堵
羊祜懷遠近得江漢之心亦以墾田獲利若三子者重
本務農使兵無艱食其謀猷術畧皆不在人下才有足
稱者然操酷虐變詐擊申商之法術雖號超世之傑豈
正直中和者所爲乎許卽謂清平之奸賊亂世之英雄
其德有貶云亮開誠心布公道邦域之內畏而愛之祜
增修德言以懷柔初附則德過於操遠矣觀亮素志欲
龍驤虎視包括四海以興漢室天不假以年遽有渭南
之恨祜輔晉武慨然有并吞之心後平吳身不及見二
子有意于功名而志弗克伸惜哉臣庸德薄才誠不敢

妄論古人伏蒙陛下親灑宸翰鋪述三子屯田足食之
事俯以賜臣臣敢不策駑礪鈍仰副聖意萬一夫服田
力穡乃亦有秋農夫職爾用屯田以足兵食誠不爲難
臣不揆願遲之歲月敢以奉詔要使忠信以進德不爲
君子之棄則臣將勉其所不逮焉若夫鞭撻四夷尊強
中國扶宗社於再安輔明天子以享萬世無疆之休臣
竊有區區之志不知得申歟否也紹興十年正月初一
日武勝定國軍節度使開府儀同三司湖北京西路宣
撫使兼營田大使武昌郡開國公食邑四千戶實封一
千七百戶臣岳飛謹書

申劉光世乞進兵狀

竊念飛以行伍賤隸辱知朝廷蒙被厚恩殞歿難報每以爲國家之難雖非所命猶當戮力矧承楚之事危迫如許累准朝廷指揮催督此正飛等捐身徇義之秋切緣王鎮撫林郭鎮撫仲威等並不見差撥軍馬前來使司王統制雖聞已起發卽日尚未知屯駐去處據探虜人急攻楚州切恐萬一疎虞於淮南諸鎮利害不細飛已於今日十五日具中使司去訖飛一面起發前往承州措置勦殺外伏乞鈞慈特捐一二千之衆別差總統制官一員前來犄角庶不致上誤國事謹具狀申伏候

指揮

申劉光世乞兵馬糧食狀

飛昨奉聖旨指揮差充前件差遣於八月十五日還至常州宜興縣于十八日起發前來祇赴新任二十二日
至江州軍歇泊據探報金人見圍楚州飛遂速急權差
統制王貴管押兵馬等船濟渡切慮遲滯有失事機不
免躬親先入泰州於二十六日夜二更到泰州城外承
准八月十九日指揮令飛與趙鎮撫立犄角飛遂措置
調發兵夫糧食并不住差人勾喚王貴等軍馬實緣舟
船數少今月初九日方盡到泰州飛已差張憲權行守

城見今大軍屯駐三光宗皇帝嫌諱與金人大寨不遠惟是新
復建康之後所有士馬瘡痍尚新羸弊方甚兼自到任
未及一旬芻蕘糗糧一一窘乏本未能即從王事重以
承楚之急甚於倒垂不可以頃刻安居理宜前進欲望
鈞慈捐一二千之衆假十餘之糧令飛得激厲士卒
徑赴賊壘解二州之圍掃犬羊之迹下以裨相公之盛
烈上以寬主上之深憂不勝幸甚

五嶽祠盟題記

自中原版蕩夷狄交侵余發憤河朔起自相臺總髮從
軍歷二百餘戰雖未能遠人夷荒洗蕩巢穴亦且快國

讐之萬一今又提一旅孤軍振起宜興建康之城一鼓
敗虜恨未能使匹馬不回耳故且養兵休卒畜銳待敵
嗣當激厲士卒功期再戰北踰沙漠蹀血虜庭盡屠夷
種迎二聖歸京闕取故地上版圖朝廷無虞主上奠枕
余之願也河朔岳飛題

題廣德軍金沙寺壁

余駐大兵宜興沿幹王事過此陪僧僚謁金仙徘徊暫
憩遂擁鐵騎千餘長驅而往當侯立奇功殄醜虜復三
關迎二聖使宋朝再振中國安疆他時過此得勒金石
不勝快哉建炎四年四月十二日河朔岳飛題

題東松寺

余自江陰軍提兵起發前赴饒郡與張招討會合噴嶠
山路殆及千里過祁門西約一舍餘當途有菴一所問
其僧曰東松遂邀后軍王團練并幙屬隨嬉焉觀其基
址乃鑿山開地創立廟廡三山環聳勢凌碧落萬木森
鬱密掩烟蓼勝景瀟灑實為可愛所恨不能款曲進程
遄速俟他日殄滅盜賊凱旋回歸復得至此卽當聊結
善緣以慰菴僧紹興改元仲春十有四日河朔岳飛題

題永州祁陽縣大營驛

權湖南帥岳飛被旨討曹成自桂嶺平蕩巢穴二廣湖

湘悉皆安妥痛念二聖遠狩沙漠天下靡寧誓忠孝賴
社稷威靈君相賢聖他日掃清胡虜復歸故國迎兩宮
還朝寬天子宵旰之憂此所志也顧蜂蟻之羣豈足為
功過此因留于壁紹興二年七月初七日

題鄱陽鬼石山寺

鬼石山前寺林泉勝景幽紫金諸佛相白雪老僧頭潭
水寒生月松風夜帶秋我來囑龍語為雨濟民憂

從駕遊西內應制

敕報遊西內春光藹上林花團千朶錦柳撚萬條金燕
遶龍旗舞鶯隨鳳輦吟君王卽天地化育一仁心

送紫巖張先生北伐

號令風霆迅天聲動北陬長驅渡河洛直擣向燕幽馬
蹀闕氏血旗梟克汗頭歸來報明主恢復舊神州

翠光亭

愛此倚欄杆誰同寓目閒輕陰晴弄日秀色隱空山島
樹蕭颯外征帆杳靄間予雖江上老心羨白雲關

題翠巖寺

秋風江上駐王師暫向雲山躡翠微忠義必期清塞水
功名直欲鎮邊圻山林嘯聚何勞取沙漠羣兇定破機
行復三關迎二聖金首席捲盡擒歸

寄浮圖慧海

湓浦廬山幾度秋長江萬折向東流男兒立志扶王室
聖主專師滅虜酋功業要刊燕石上歸休終伴赤松遊
丁寧寄與東林老蓮社從今着力修

池州翠微亭

經年塵土滿征衣特特尋芳上翠微好水好山看不足
馬蹄催趁月明歸

題新淦蕭寺壁

雄氣堂堂貫斗牛誓將直節報君讐斬除頑惡還車駕
不問登壇萬戶侯

滿江紅

怒髮衝冠，凭欄處、瀟瀟雨歇。抬望眼，仰天長嘯，壯懷激
烈。三十功名塵與土，八千里路雲和月。莫等閒、白了少
年頭，空悲切。靖康恥，猶未雪。臣子恨，何時滅。駕長車，
踏破賀蘭山缺。壯志飢餐胡虜肉，笑談渴飲匈奴血。待
從頭、收拾舊山河，朝天闕。

小重山

昨夜寒蛩不住鳴，驚回千里夢。已三更，起來獨自遶階
行人悄悄，簾外月籠明。白首為功名，舊山松竹老，阻
歸程。欲將心事付瑤琴，知音少。絃斷有誰聽。

宋史本傳

岳飛字鵬舉，相州湯陰人。世力農。父和能節食以濟飢
者，有畊侵其地，割而與之。貫其財者，不責償。飛生時有
大禽若鵠，飛鳴室上，因以為名。未彌月，河決內黃，水暴
至，母姚抱飛坐穰中，衝濤及岸，得免。人異之。少負氣節，
沈厚寡言，家貧力學，尤好左氏春秋。孫吳兵法，生有神
力，未冠挽弓三百斤，弩八石，學射于周同，盡其術。能左
右射，同死，朔望設祭於其家。父義之曰：汝為時用，其徇
國死義乎。宣和四年，真定宣撫劉韜募敢戰士，飛應募。
相有劇賊陶俊，賈進和飛請百騎滅之，遣卒偽為商入

賊境賊掠以充部伍飛遣百人伏山下自領數十騎逼賊壘賊出戰飛佯北賊來追之伏兵起先所遣卒擒後及進和以歸康王至相飛因劉浩見命招賊吉倩倩以衆三百八十人降補承信郎以鐵騎三百往李固渡嘗敵敗之從浩解東京圍與敵相持于滑南領百騎習兵河上敵卒至飛麾其徒曰敵雖衆未知我虛實當及其未定擊之乃獨馳迎敵有驍將舞刀而前飛斬之敵大敗遷秉義郎隸留守宗澤戰開德曹州皆有功澤大奇之曰爾勇智才藝古良將不能過然好野戰非萬全計因授以陣圖飛曰陣而後戰兵法之常運用之妙存乎

一心澤是其言康王卽位飛上書數千言大畧謂陛下已登大寶社稷有主已足伐敵之謀而勤王之師日集彼方謂吾素弱宜乘其怠擊之黃潛善汪伯彥輩不能承聖意恢復奉車駕日益南恐不足繫中原之望臣願陛下乘敵穴未固親率六軍北渡則將士作氣中原可復書聞以越職奪官歸詣河北招討使張所所待以國士借補修武郎充中軍統領所問曰汝能敵幾何飛曰勇不足恃用兵在先定謀纒枝曳柴以敗荆莫敖采樵以致絞皆謀定也所矍然曰君殆非行伍中人飛因說之曰國家都汴恃河北以爲固苟馮據要衝時列重鎮

一城受圍則諸城或撓或救金人不能窺河南而京師
根本之地固矣招撫誠能提兵壓境飛唯命是從所大
喜借補武經郎命從王彥渡河至新鄉金兵盛彥不敢
進飛獨引所部鏖戰奪其纛而舞諸軍爭奮遂拔新鄉
翌日戰侯兆川身被十餘槍士皆死戰又敗之夜屯石
門山下或傳金兵復至一軍皆驚飛堅卧不動金兵卒
不來食盡走彥壁乞糧彥不許飛引兵益北戰于太行
山擒金將拓跋耶烏居數日復遇敵飛單騎持丈八鐵
槍刺殺黑風大王敵衆敗走飛自知與彥有隙復歸宗
澤爲留守司統制澤卒杜充代之飛居故職二年戰昨

城又戰黑龍潭皆大捷從閭勅保護凌寢大戰汜水關
射殪金將大破其衆駐軍竹蘆渡與敵相持選精銳三
百伏前山下令各以薪芻交縛兩束夜半爇四端而舉
之金人疑援兵至驚潰三年賊黃善曹成孔彥舟等合
衆五十萬薄南薰門飛所部僅八百衆懼不敵飛曰吾
爲諸君破之左挾弓右運矛橫衝其陣賊亂大敗之又
擒賊杜叔五孫海於東明借補英州刺史黃善圍陳州
飛戰於清河擒其將孫勝孫清以歸授真刺史杜充將
還建康飛曰中原地尺寸不可棄今一舉足此地非我
有他日欲復取之非數十萬衆不可充不聽遂與俱歸

師次鐵路步遇賊張用至六合遇李成與戰皆敗之成遣輕騎劫憲臣犒軍銀帛飛進兵掩擊之成奔江西時命充守建康金人與成合寇烏江充閉門不出飛泣諫請視師充竟不出金人遂由馬家渡渡江充遣飛等迎戰王瓌先遁諸將皆潰獨飛力戰會充已降金諸將多行剽掠惟飛軍秋毫無犯兀朮趨杭州飛要擊至廣德境中六戰皆捷擒其將王權俘簽軍首領四十餘察其可用者結以恩遣還令夜斫營縱火飛乘亂縱擊大敗之駐軍鍾村軍無見糧將士忍飢不敢擾民金所籍兵相謂曰此岳爺軍爭來降附四年兀朮攻常州宜興

令迎飛移屯焉盜郭吉聞飛來遁入湖飛遣王貴傅慶追破之又遣辨士馬臯林聚盡降其衆有威武者不從飛單騎入其營斬之避地者賴以免圖飛像祠之金人再攻常州飛四戰皆捷尾襲於鎮江東又捷戰於清水亭又大捷橫屍十五里兀朮趨建康飛設伏牛頭山待之夜令百人黑衣混金營中擾之金兵驚自相攻擊兀朮次龍灣飛以騎三百步兵二千馳至新城大破之兀朮奔淮西遂復建康飛奏建康爲要害之地宜選兵固守仍益兵守淮拱護腹心帝嘉納兀朮歸飛邀擊於靜安敗之詔討戚方飛以三千人營於苦嶺方遁俄益兵

來飛自領兵千人戰數十合皆捷會張俊兵至方遂降
范宗尹言張俊自浙西來盛稱飛可用遷通泰鎮撫使
兼知泰州飛辭乞淮南東路一重難任使收復本路州
郡乘機漸進使山東河北河東京畿等路次第而復會
金攻楚急詔張俊援之俊辭乃遣飛行而命劉光世出
兵援飛飛屯三塾爲楚援尋抵承州三戰三捷殺高太
保俘酋長七十餘人光世等皆不敢前飛師孤力寡楚
遂陷詔飛還守通泰有旨可守卽守如不可但於沙洲
保護百姓伺便掩擊飛以秦無險可恃退保柴墟戰於
南霸橋金大敗渡百姓於沙上飛以精騎二百殿金兵

不敢近飛以泰州失守待罪紹興元年張俊請飛同討
李成時成將馬進犯洪州連營西山飛曰賊貪而不慮
後若以騎兵自上流絕生米渡出其不意破之必矣飛
請自爲先鋒俊大喜飛重鎧躍馬潛出賊右突其陣所
部從之進大敗走筠州飛抵城東賊出城布陣十五里
飛設伏以紅羅爲幟上刺岳字選騎二百隨幟而前賊
易其少薄之伏發賊敗走飛使人呼曰不從賊者坐吾
不汝殺坐而降者八萬餘人進以餘卒奔成於南康飛
夜引兵至朱家山又斬其將趙萬成聞進敗自引兵十
餘萬來飛與遇於樓子莊大破成軍追斬進成走蘄州

降偽齊張用寇江西用亦相人飛以書諭之曰吾與汝
同里南薰門鐵路步之戰皆汝所悉今吾在此欲戰則
出不戰則降用得書曰果吾父也遂降江淮平俊奏飛
功第一加神武右軍副統制留洪州彈壓盜賊授親衛
大夫建州觀察使建寇范汝爲陷邵武江西安撫李回
檄飛分兵保建昌軍及撫州飛遣人以岳字幟植城門
賊望見相戒勿犯賊黨姚達饒青逼建昌飛遣王萬徐
慶討擒之陞神武副軍都統制二年賊曹成擁衆十餘
萬由江西歷湖湘據道賀二州命飛權知潭州兼權荆
湖東路安撫都總管付金字牌黃旗招成成聞飛將至

驚曰岳家軍來矣卽分道而遁飛至茶陵奉詔招之成
不從飛奏比年多命招安故盜力強則肆暴力屈則就
招苟不畧加勦除蠶起之衆未可遽殄許之飛入賀州
境得成謀者縛之帳下飛出帳調兵食吏曰糧盡矣奈
何飛佯曰姑反茶陵已而顧謀若失意狀頓足而人陰
令逸之謀歸告成成大喜期翌日來追飛命士蓐食潛
趨遠嶺未明已至太平場破其砦成據險拒飛飛麾兵
掩擊賊大潰成走據北藏嶺上梧關遣將迎戰飛不陣
而鼓士爭奮奪二隘據之成又自桂嶺置砦至北藏嶺
連控隘道親以衆十餘萬守蓬頭嶺飛部才八千一鼓

登嶺破其衆成奔連州飛謂張憲等曰成黨散去追而
殺之則脇從者可憫縱之則復聚爲盜今遣若等誅其
酋而撫其衆慎勿妄殺累主上保民之仁於是憲自賀
連徐慶自邵道王貴自郴桂招降者二萬與飛會連州
進兵道成走宣撫司降時以盛夏行師瘴地撫循有
方士無一人死癘者嶺表平授武安軍承宣使屯江州
甫入境安撫李回檄飛捕劇賊馬友郝通劉忠李通李
宗亮張式皆平之三年春召赴行在江西宣諭劉大中
奏飛兵有紀律人恃以安今赴行在恐盜復起不果行
時虔吉盜連兵寇掠循梅廣惠英韶南雄南安建昌汀

邵武諸郡帝乃專命飛平之飛至虔州固石洞賊彭友
悉衆至雩都迎戰躍馬馳突飛麾兵卽馬上擒之餘酋
退保固石洞洞高峻環水止一徑可入飛列騎山下令
皆持滿黎明遣死士疾馳登山賊衆亂棄山而下騎兵
圍之賊呼丐命飛令勿殺受其降授徐慶等方畧捕諸
郡餘賊皆破降之初以隆祐震驚之故密旨令飛屠虔
城飛請誅首惡而赦脇從不許請至三四帝乃曲赦人
感其德繪像祠之餘寇高聚張成犯袁州飛遣王貴平
之秋入見帝手書精忠岳飛字製旗以賜之授鎮南軍
承宣使江南西路沿江制置使又改神武後軍都統制

仍制置使李山英全吳錫李橫牛臯皆隸焉偽齊遣李成挾金人入侵破襄陽唐鄧隨郢諸州及信陽軍湖寇楊么亦與偽齊通欲順流而下李成又欲自江西陸行趨兩浙與么會帝命飛爲之備四年除兼荆南鄂岳州制置使飛奏襄陽等六郡爲恢復中原基本今當先取六郡以除心膂之病李成遠遁然後加兵湖湘以殄羣盜帝以諭趙鼎鼎曰知上流利害無如飛者遂授黃復州漢陽軍德安府制置使飛渡江中流顧幕屬曰飛不擒賊不涉此江抵郢州城下偽將京超號萬人敵乘城拒飛飛鼓衆而登超投崖死復郢州遣張憲徐慶復隨

州飛趣襄陽李成迎戰左臨襄江飛笑曰步兵利險阻騎兵利平曠成左列騎江岸右列步平地雖衆十萬何能爲舉鞭指王貴曰爾以長鎗步卒擊其騎兵指牛臯曰爾以騎兵擊其步卒合戰馬應鎗而斃後騎皆擁入江步卒死者無數成夜遁復襄陽劉豫益成兵屯新野飛與王萬夾擊之連破其衆飛奏金賊所愛惟子女金帛志已驕惰劉豫僭僞人心終不忘宋如以精兵二十萬直擣中原恢復故疆誠易爲力襄陽隨郢地皆膏腴苟行營田其利爲厚臣候糧足卽過江北勦戮敵兵時方重深入之舉而營田之議自是興矣進兵鄧州成與金

將劉合李董列砦拒飛飛遣王貴張憲掩擊賊衆大潰
劉合李董僅以身免賊黨高仲退保鄧城飛引兵一鼓
拔之擒高仲復鄧州帝聞之喜曰朕素聞岳飛行軍有
紀律未知能破敵如此又復唐州信陽軍襄漢平飛辭
制置使乞委重臣經畫荆襄不許趙鼎奏湖北鄂岳最
爲上流要害乞令飛屯鄂岳不惟江西藉其聲勢湖廣
江浙亦獲安妥乃以隨郢唐鄧信陽軍並爲襄陽府路
隸飛飛移屯鄂授清遠軍節度使湖北路荆襄潭州制
置使封武昌縣開國子元本劉豫合兵圍廬州帝手札
命飛解圍提兵趨廬僞齊已驅甲騎五千逼城飛張岳

字旗與精忠旗金兵一戰而潰廬州平飛奏襄陽等六
郡人戶闕半糧乞量給官錢免官私逋負州縣官以招
集流亡爲殿最五年入覲封母國夫人授飛鎮寧崇信
軍節度使湖北路荆襄潭州制置使進封武昌郡開國
侯又除荆湖南北襄陽路制置使神武後軍都統制命
招捕楊么飛所部皆西北人不習水戰飛曰兵何常顧
用之何如耳先遣使招諭之賊黨黃佐曰岳節使號令
如山若與之敵萬無生理不如往降節使誠信必善遇
我遂降飛表授佐武義大夫單騎按其部拊佐背曰子
知逆順者果能立功封侯豈足道欲復遣子至湖中視

其可乘者擒之可勸者招之如何佐感泣誓以死報時
張浚以都督軍事至潭叅政席益與浚語疑飛玩寇欲
以聞浚曰岳侯忠孝人也兵有深機胡可易言益慚而
止黃佐襲周倫砦殺倫擒其統制陳貴等飛上其功遷
武功大夫統制任士安不稟王夔令軍以此無功飛鞭
士安使餌賊曰三日賊不平斬汝士安宣言岳太尉兵
二十萬至矣賊見止士安軍併力攻之飛設伏士安戰
急伏兵四起擊賊賊走會召浚還防秋飛袖小圖示浚
浚欲俟來年議之飛曰已有定畫都督能少留不八日
可破賊浚曰何言之易飛曰王四廂以王師攻水寇則

難飛以水寇攻水寇則易水戰我短彼長以所短攻所
長所以難若因敵將用敵兵奪其手足之助離其腹心
之託使孤立而後以王師乘之八日之內當俘諸酋浚
許之飛遂如鼎州黃佐招楊欽來降飛喜曰楊欽驍悍
旣降賊腹心潰矣表授欽武義大夫禮遇甚厚乃復遣
歸湖中兩日欽說余端劉說等降飛詭罵欽曰賊不盡
降何來也杖之復令入湖是夜掩賊營降其衆數萬么
負固不服方浮舟湖中以輪激水其行如飛旁置撞竿
官舟迎之輒碎飛伐君山木爲巨筏塞諸港汶又以腐
木亂草浮上流而下擇水淺處遣善罵者挑之且行且

罵賊怒來追則草木壅積舟輪礙不行飛亟遣兵擊之賊奔港中爲筏所拒官軍乘筏張牛革以蔽矢石舉巨木撞其舟盡壞么投水牛臯擒斬之飛入賊壘餘酋驚曰何神也俱降飛親行諸砦慰撫之縱老弱歸田籍少壯爲軍果八日而賊平浚歎曰岳侯神算也初賊恃其險曰欲犯我者除是飛來至是人以其言爲讖獲賊舟千餘鄂渚水軍爲沿江之寇詔兼斬黃制置使飛以目疾乞辭軍事不許加檢校少保進封公還軍鄂州除荆湖南北襄陽路招討使六年太行山忠義社梁興等百餘人慕飛義率衆來歸飛入覲面陳襄陽自收復後未

置監司州縣無以按察帝從之以李若虛爲京西南路提舉兼轉運提刑又令湖北襄陽府路自知州通判以下賢否許飛得自黜陟張浚至江上會諸大帥獨稱飛與韓世忠可倚大事命飛屯襄陽以窺中原曰此君素志也飛移軍京西改武勝定國軍節度使除宣撫副使置司襄陽命往武昌調軍居母憂降制起復飛扶輿還廬山連表乞終喪不許累詔趣起乃就軍又命宣撫河東節制河北路首遣王貴等攻虢州下之獲糧十五萬石降其衆數萬張浚曰飛措畫甚大今已至伊洛則太行一帶山砦必有應者飛遣楊再興進兵至長水縣再

戰皆捷中原響應又遣人焚蔡州糧九月劉豫遣子麟
猊分道寇淮西劉光世欲舍廬州張俊欲棄盱眙同奏
召飛以兵東下欲使飛當其鋒而已得退保張浚謂岳
飛一動則襄漢何所制力沮其議帝慮俊光世不足任
命飛東下飛自破曹成平楊么凡六年皆盛夏行師致
目疾至是甚聞詔即日啟行未至麟敗飛奏至帝語趙
鼎曰劉麟敗北不足喜諸將知尊朝廷爲可喜遂賜札
言敵兵已去淮卿不須進發其或襄鄧陳蔡有幾可乘
從長措置飛乃還軍時偽齊屯兵窺唐州飛遣王貴董
先等攻破之焚其營奏圖蔡以取中原不許飛召貴等

還七年入見帝從容問曰卿得良馬否飛曰臣有二馬
日啖芻豆數斗飲泉一斛然非精潔則不受介而馳初
不甚疾比行百里始奮迅自午至酉猶可二百里褫鞍
甲而不息不汗若無事然此其受大而不苟取力裕而
不求逞致遠之材也不幸相繼以死今所乘者日不過
數升而秣不擇粟飲不擇泉攬轡未安踴躍疾驅甫百
里力竭汗喘殆欲斃然此其寡取易盈好逞易窮駑鈍
之材也帝稱善曰卿今議論極進拜太尉繼除宣撫使
兼營田大使從幸建康以王德鬻瓊兵隸飛詔諭德等
曰聽飛號令如朕親行飛數見帝論恢復之畧又手疏

言金人所以立劉豫於江南蓋欲荼毒中原以中國攻中國精卒因得休兵觀釁臣欲陛下假臣月日便則提兵趨京洛據河陽陝府潼關以號召五路叛將叛將既還遣王師前進彼必棄汴而走河北京畿陝右可以盡復然後分兵濬滑經畧兩河如此則劉豫成擒金人可滅社稷長久之計實在此舉帝答曰有臣如此顧復何憂進止之機朕不中制又召至寢閣命之曰中興之事一以委卿命節制光州飛方圖大舉會秦檜主和遂不以德瓊兵隸飛詔詣都督府與張浚議事浚謂飛曰王德淮西軍所服浚欲以爲都統而命呂祉以督府參謀

領之如何飛曰德與瓊素不相下一旦握之在上則必爭呂尚書不習軍旅恐不足服衆浚曰張宣撫如何飛曰暴而寡謀尤瓊所不服浚曰然則楊沂中爾飛曰沂中視德等爾豈能馭此軍浚艱然曰浚固知非太尉不可飛曰都督以正問飛不敢不盡其愚豈以得兵爲念耶卽日上章乞解兵柄終喪服以張憲攝軍事步歸廬母墓側浚怒奏以張宗元爲宣撫判官監其軍帝累詔趣飛還職飛力辭詔幕屬造廬以死請凡六日飛趨朝待罪帝慰遣之宗元還言將和士銳人懷忠孝皆飛訓養所致帝大悅飛奏比者寢閣之命咸謂聖斷已堅何

藝海珠塵
至今尚未決臣願提兵進討順天道囚人心以曲直爲老壯以逆順爲強弱萬全之效可必又奏錢塘僻在海隅非用武地願陛下建都上游用漢光武故事親率六軍往來督戰庶將士知聖意所向人人用命未報而鄴瓊叛浚始悔飛復奏願進屯淮甸伺便擊瓊期於破滅不許詔駐師江州爲淮浙援飛知劉豫結粘罕而兀朮惡劉豫可以間而動會軍中得兀朮謀者飛佯責之曰汝非我軍中人張斌耶吾向遣汝至齊約誘至四太子汝往不復來吾繼遣人問齊已許我今冬以會合寇江爲名致四太子於清河汝所持書竟不至何背我耶謀

冀緩死卽詭服乃作蠟書言與劉豫同謀誅兀朮事因謂謀曰吾今貸汝復遣至齊問舉兵期封股納書戒勿泄謀歸以書示兀朮兀朮大驚馳白其主遂廢豫飛奏宜乘廢豫之際擣其不備長驅以取中原不報八年還軍鄂州王庶視師江淮飛與庶書今歲若不舉兵當納節請閉庶甚壯之秋召赴行在命詣資善堂見皇太子飛退而喜曰社稷得人矣中興基業其在是乎會金遣使將歸河南地飛言金人不可信和好不可恃相臣謀國不臧恐貽後世譏檜銜之九年以復河南大赦飛表謝寓和議不便之意有唾手燕雲復讐報國之語授開

府儀同三司飛力辭謂今日之事可危而不可安可憂而不可賀可訓兵飭士謹備不虞而不可論功行賞取笑敵人三詔不受帝溫言弊諭乃受會遣士僕謁諸陵飛請以輕騎從酒埽實欲觀釁以伐謀又奏金人無事請和此必有肘腋之虞名以地歸我實寄之也檜白帝止其行十年金人攻拱亭劉錡告急命飛馳援飛遣張憲姚政赴之帝賜札曰設施之方一以委卿朕不遙度飛乃遣王貴牛皐董先楊再興孟邦傑李寶等分布經畧西京汝鄭潁昌陳曹光蔡諸郡又命梁興渡河糾合忠義社取河東北州縣又遣兵東援劉錡西援郭浩自

以其軍長驅以闕中原將發密言先正國本以安人心然後不常厥居以示無忘復讐之意帝得奏大褒其忠授少保河南府路陝西河東北路招討使尋改河南北諸路招討使未幾所遣諸將相繼奏捷大軍在潁昌諸將分道出戰飛自以輕騎駐鄆城兵勢甚銳兀术大懼會龍虎大王議以爲諸帥易與獨飛不可當欲誘致其師併力一戰中外聞之大懼詔飛審處自固飛曰金人技窮矣乃日出挑戰且罵之兀术怒合龍虎大王蓋天大王與韓常之兵逼鄆城飛遣子雲領騎兵直貫其陣戒之曰不勝先斬汝鑿戰數十合賊屍布野初兀术有

勁軍皆重鎧貫以韋索三人爲聯號拐子馬官軍不能當是役也以萬五千騎來飛戒步卒以麻札刀入陣勿仰視第斫馬足拐子馬相連一馬仆二馬不能行官軍奮擊遂大敗之兀朮大慟曰自海上起兵皆以此勝今已矣兀朮益兵來部將王剛以五十騎覘敵遇之奮斬其將飛時出視戰地望見黃塵蔽天自以四十騎突戰敗之方圍城再捷飛謂雲曰賊屢敗必還攻潁昌汝宜速援王貴旣而兀朮果至貴將遊奕雲將背嵬戰於城西雲以其兵八百挺前決戰步軍張左右翼繼之殺兀朮婿夏金吾副統軍精罕索孛堇兀朮遁去梁興會太

行忠義及兩河豪傑等累戰皆捷中原大震飛奏興等過河人心願歸朝廷金兵累敗兀朮等皆令老小北去正中興之機飛進軍朱仙鎮距汴京四十五里與兀朮對壘而陣遣驍將以背嵬騎五百奮擊大破之兀朮遁還汴京飛檄陵臺令行視諸陵葺治之先是紹興五年飛遣梁興等布德意招納兩河豪傑山砦韋銓孫謀等斂兵固堡以待王師李通胡清李寶李興張恩孫琪等舉衆來歸金人動息山川險要一時皆得其實盡磁相開德澤潞晉絳汾隰之境皆期日興兵與官軍會其所揭旗以岳爲號父老百姓爭挽車牽牛載糗糧以餽義

軍頂盆焚香迎候者充滿道路自燕以南金號令不行
兀朮欲簽軍以抗飛河北無一人從者乃歎曰自我起
北方以來未有如今日之挫折金帥烏陵思謀素號桀
黠亦不能制其下但諭之曰毋輕動候岳家軍來卽降
金統制王鎮統領崔慶將官李觀崔虎葉旺等皆率所
部降以至禁衛龍虎大王下忙查千戶高勇之屬密受
飛旗榜自北方來降金將軍韓常欲以五萬衆內附飛
大喜語其下曰直抵黃龍府與諸君痛飲爾方指日渡
河而檣欲畫淮以北棄之風臺臣請班師飛奏金人銳
氣沮喪盡棄輜重疾走渡河豪傑向風士卒用命時不

再來機難輕失檣知飛志銳不可回乃先詔張俊楊沂
中等歸而後言飛孤軍不可久留乞令班師一日奉十
二金字牌飛憤惋泣下東向再拜曰十年之力廢于一
旦飛班師民遮馬慟哭訴曰我等戴香盆運糧草以迎
官軍金人悉知之相公去我輩無噍類矣飛亦悲泣取
詔示之曰吾不得擅留哭聲震野飛留五日以待其從
從而南者如市亟奏以漢上六郡閒田處之方兀朮棄
汴去有書生叩馬曰太子毋走岳少保且退矣兀朮曰
岳少保以五百騎破五十萬京城日夜望其來何謂可
守生曰自古未有權臣在內而大將能立功於外者岳

少保且不免况欲成功乎兀术悟遂留飛既歸所得州縣旋復失之飛力請解兵柄不許自廬入覲帝問之飛拜謝而已十一年謀報金分道渡淮飛請合諸帥之兵破敵兀术韓常與龍虎大王疾驅至廬帝趣飛應援凡十七札飛策金人舉國南來巢穴必虛若長驅京洛以擣之彼必奔命可坐而敝時飛方苦寒嗽力疾而行又恐帝急於退敵乃奏臣如擣虛勢必得利若以爲敵方在近未暇遠圖欲乞親至蘄黃以議攻却帝得奏大喜賜札曰卿苦寒疾乃爲朕行國爾忘身誰如卿者師至廬州金兵望風而遁飛還兵於舒以俟命帝又賜札以

飛小心恭謹不專進退爲得體兀术破濠州張俊駐軍黃連鎮不敢進楊沂中遇伏而敗帝命飛救之金人聞飛至又遁時和議既決檜患飛異已乃密奏召三大將論功行賞韓世忠張俊已至飛獨後檜又用叅政王次翁計俟之六七日既至授樞密副使位叅知政事上飛固請還兵柄五月詔同俊往楚州措置邊防總韓世忠軍還駐鎮江初飛在諸將中年最少以列校拔起累立顯功世忠俊不能平飛屈已下之幕中輕銳教飛勿苦降意金人攻淮西俊分地也俊始不敢行師卒無功飛聞命卽行遂解廬州圍帝授飛兩鎮節俊益恥楊么平

飛獻俊世忠樓船各一兵械畢備世忠大悅俊反忌之
淮西之役俊以前途糧乏誅飛飛不爲止帝賜札褒諭
有曰轉餉艱阻卿不復顧俊疑飛漏言還朝反倡言飛
逗遛不進以乏餉爲辭至視世忠軍俊知世忠忤檜欲
與飛分其背寇軍飛義不肯俊大不悅及同行楚州城
俊欲修城爲備飛曰當戮力以圖恢復豈可爲退保計
俊變色會世忠軍吏景著與總領胡紉言一樞密若分
世忠軍恐至生事紉上之朝檜捕著下大理寺將以扇
搖誣世忠飛馳書告以檜意世忠見帝自明俊于是大
憾飛遂倡言飛議棄山陽且密以飛報世忠事告檜檜

大怒初檜逐趙鼎飛每對客歎息又以恢復爲己任不
肯附和議讀檜奏至德無常師主善爲師之語惡其欺
罔恚曰君臣大倫根於天性大臣而忍面謾其主耶兀
朮遺檜書曰汝朝夕以和請而岳飛方爲河北圖必殺
飛始可和檜亦以飛不死終梗和議已必及禍故力謀
殺之以諫議大夫万俟卨與飛有怨風高劾飛又風中
丞何鑄侍御史羅汝楫交章彈論大率謂今春金人攻
淮西飛畧至舒蘄而不進比與俊按兵淮上又欲棄山
陽而不守飛累章請罷樞柄尋還兩鎮節充萬壽觀使
奉朝請檜志未伸也又諭張俊令劫王貴誘王俊誣告

張憲謀還飛兵槽遣使捕飛父子證張憲事使者至飛
笑曰皇天后土可表此心初命何鑄鞫之飛裂裳以背
示鑄有盡忠報國四大字深入膚理既而閱實無左驗
鑄明其無辜改命万俟卨誣飛與憲書令虛申探報
以動朝廷雲與憲書令措置使飛還軍言其書已焚飛
坐繫兩月無可證者或教卨以臺章所指淮西事爲言
卨喜白檜簿錄飛家取當時御札藏之以滅迹又逼孫
革等證飛受詔逗留命評事元龜年取行軍時日雜定
之傳會其獄歲暮獄不成檜手書小紙付獄卽報飛死
時年三十九雲棄市籍家貲徙家嶺南幕屬于鵬等從

坐者六人初飛在獄大理寺丞李若樸何彥猷大理卿
薛仁輔並言飛無罪高俱劾去宗正卿士儻請以百日
保飛高亦劾之竄死建州布衣劉允升上書訟飛冤下
棘寺以死凡傳成其獄者皆遷轉有差獄之將上也韓
世忠不平詣檜詰其實檜曰飛子雲與張憲書雖不明
其事體草須有世忠曰莫須有三字何以服天下時洪
皓在金國中蠟書馳奏以爲金人所畏服者惟飛至以
父呼之諸酋聞其死酌酒相賀飛至孝母留河北遣人
求訪迎歸母有痼疾藥餌必親母卒水漿不入口者三
日家無姬侍吳玠素服飛願與交驩飾名姝遺之飛曰

主上宵旰豈大將安樂時却不受玠益敬服少豪飲帝
戒之曰卿異時到河朔乃可飲遂絕不飲帝初爲飛營
第飛辭曰敵未滅何以家爲或問天下何時太平飛曰
文臣不愛錢武臣不惜死天下平矣師每休舍課將士
注坡跳壕皆重鎧習之子雲常習注坡馬躡怒而鞭之
卒有取民麻一縷以束芻者立斬以徇卒夜宿民開門
願納無敢入者軍號凍死不拆屋餓死不擄掠卒有疾
躬爲調藥諸將遠戍遣妻問勞其家死事者哭之而育
其孤或以子婚其女凡有頒犒均給軍吏秋毫不私善
以少擊衆欲有所舉盡召諸統制與謀謀定而後戰故

有勝無敗猝遇敵不動故敵爲之語曰撼山易撼岳家
軍難張浚嘗問用兵之術曰仁智信勇嚴缺一不可調
軍食必感額曰東南民力耗敝極矣荆湖平募民營田
又爲屯田歲省漕運之半帝手書曹操諸葛亮羊祜三
事賜之飛跋其後獨指操爲奸賊而鄙之尤檜所惡也
張所死飛感舊恩鞠其子宗本奏以官李寶自楚來歸
韓世忠留之寶痛哭願歸飛世忠以書來論飛復曰均
爲國家何分彼此世忠歎服襄陽之役詔光世爲援六
郡旣復光世始至飛奏先賞光世軍好賢禮士博覽經
史雅歌投壺恂恂如儒生每辭官必曰將士效力飛何

功之有然忠憤激烈議論持正不挫於人卒以此得禍
檜死議復飛官万俟卨謂金方願和一旦錄故將疑天
下心不可及紹興末金益猖獗太學生程宏圖上書訟
飛寃詔飛家自便初檜惡岳州同飛姓改爲純州至是
仍舊中丞汪澈宣撫荆襄故部曲合辭訟之哭聲雷震
孝宗詔復飛官以禮改葬賜錢百萬求其後悉官之建
廟於鄂號忠烈淳熙六年諡武穆嘉定四年追封鄂王
五子雲雷霖震霆

雲飛養子年十二從張憲戰多得其力軍中呼曰羸官
人飛征伐未嘗不與數立奇功飛輒隱之每戰以手握

兩鐵椎重八十斤先諸軍登城攻下隨州又攻破鄧州
襄漢平功在第一飛不言逾年銓曹辨之始遷武翼郎
楊么平功亦第一又不上張浚廉得其實曰岳侯避寵
榮廉則廉矣未得爲公也奏乞推異數飛力辭不受嘗
以特旨遷三資飛辭曰士卒冒矢石立奇功始沾一級
男雲遠列崇資何以服衆累表不受穎昌大戰無慮十
數出入行陣體被百餘創甲裳爲赤以功遷忠州防禦
使飛又辭命帶御器械飛又力辭之終左武大夫提舉
醴泉觀死年二十三孝宗初與飛同復元官以禮祔葬
贈安遠軍承宣使雷忠訓郎闕門祔候贈武畧郎霖朝

藝海珠璣
散大夫敷文閣待制贈太中大夫初飛下獄檜令親黨
王會搜其家得御札數篋束之左藏南庫霖請於孝宗
還之霖子珂以淮西十五御札辨驗彙次凡出師應援
之先後皆可考嘉定間爲顯天辨誣集五卷天定錄二
卷上之晉朝奉大夫提舉江南東路茶鹽公事霆修武
郎閣門祇候

論曰西漢而下若韓彭絳灌之爲將代不乏人求其文
武全器仁智並施如宋岳飛者一代豈多見哉史稱關
雲長通春秋左氏學然嘗見其文章飛北伐軍至汴
梁之朱仙鎮有詔班師飛自爲表答詔忠義之言流出

肺腑真有諸葛孔明之風而卒死於秦檜之手蓋飛與
檜不兩立使飛得志則金警可報朱恥可雪檜得志則
飛有死而已昔劉宋殺檀道濟道濟下獄瞋目曰自壞
汝萬里長城高宗忍自棄其中原故忍殺飛嗚呼冤哉
嗚呼冤哉



採蓮復採蓮藕亦不可棄中有不斷絲似妾纏綿意
採蓮復採蓮爭如採荷好花謝葉獨存團圓以終老
採蓮復採蓮湖水清且深徒能照妾面不能照妾心
採蓮復採蓮下有孤鴛鴦秋花不結實夜夜守空房

又

蓮開花覆水蓮謝藕在泥不學青萍葉隨波東復西
朝採並蒂蓮暮縮同心結不學綠楊枝含嚙送離別

又

蓮舟何處來同聚南湖口郎憐波上花妾愛泥中藕
藕有畫白節花有艷冶容郎心異妾心三歎掩歸篷

五言絕句

題天柱山圖

拔翠五雲中擎天不計功誰能凌絕頂看取日升東

畫蟬

飲露身何潔吟風韻更長斜陽千萬樹無處避螳螂

畫古木幽篁

碧海珊瑚樹清湘翡翠毛無因將寄遠日暮寸心勞

畫葡萄

江海春雷動羣龍悉上天秋來風露冷箇箇抱珠眠

題江亭柳色圖

有懷故人
劉庸道

丁孝子詩集卷一

昔年醞酒地江漢一茅亭同會人何在東風柳又青

次先兄太守題竹韻

謹次其韻

先兄死事之十有七年于故史董文中家見所作因雪涕

玉笋謝朝班西風海國寒無人知苦節落日下長安

題赤壁圖

橫槩英聲遠聞簫逸興長至今風月夜鶴夢繞黃岡

題謝安觀山圖

欲為蒼生起神州未可還籌思保江表安若會稽山

題長溪獨釣圖

為舒庵作

溪上釣西風心隨溪水東後車今已載何待兆非熊

題鄭高士畫竹

鄭君高節士瀟灑絕人羣獨把青鸞尾山窻掃白雲

題畫梅竹

為郭志善作

姑射下天壇天空鬢影寒雪深歸路迴獨自跨青鸞

畫梅

為日翁作

老向江南住梅花共歲寒故人清興在踏雪幾回看

畫蘭

同前

湘皋風日美芳草不勝春欲採初為佩慚非楚蓋臣

畫菜

為馬上舍作

蔬畦新雨過小摘稱君貧若入君王夢瓊林第一人

畫竹

拂素寫晴窓亭亭玉一雙蒼龍雷喚醒風雨徧湘江

畫蘿蔔

高氏賢兄弟常將備夕飡如何清列士今作畫圖看

畫菘菜

老圃青青甲平生味飽諳本無食肉相豈是厭肥甘

枯木竹石

青天騰一蛟白日臥雙虎何人歌竹枝遙隔瀟湘浦

小畫

遠水吞天碧危峰拔地青何由雲樹底揮塵坐茅亭

又

翠黛浮晴漢虬枝立暝煙迴舟不用楫江上水吞天

靜樂軒

為脩江向自誠作

清心如止水一月印當中誰道芭蕉雨瀟瀟解惱公

臨水梅

為昌長老作

疎花清有影止水淨無埃好似菩提樹明明照鏡臺

橫窓梅

同前

禪窓夜虛明照見耀仙影上人對空花悠然發深省

畫竹

為天師題

夜誦藥珠經羣真悉下聽仙壇晨自掃拾得鳳凰翎

長江萬里圖

將歸武昌
自賦二首

長江千萬里何處是儂鄉忽見晴川樹依稀認漢陽
長嘯還江國遲回別海鄉春潮如有意相送過潯陽

畫梅

松筠淹雨雪桃李逐風塵不有梅花樹誰回天地春

又

鐵石挺孤杓冰霜抱貞素一笑桃李空嗟哉歲云暮

詠蟬

蟬性極清高愁吟類楚騷炎天風露薄度日亦嗷嗷

題落花芳草白頭翁

草長連朝雨花殘一夜風青春留不住啼殺白頭翁

五言律詩

汨汨

汨汨在塵埃羈懷不暫開病將顏玉去愁送鬢絲來招
隱慙高蹈扶顛乏大才行藏成兩失回首有餘哀

送四兄往杭後寄

臨別強言笑獨歸情轉哀離魂悽欲斷孤抱鬱難開太
守堤邊柳徵君宅畔梅過逢如見憶煩寄一枝來

逃禪室臥病東諸禪侶

高秋多病客古寺寄黃昏野迴常疑處天寒早閉門離

愁燈下影鄉淚枕邊痕賴有諸禪侶情親似弟昆

次烏繼善先生見寄韻

扶杖日行吟悠然太古心風雲遺壯氣山水効清音大雅消沈久斯文感慨深幸瞻喬梓在奕葉盡成陰

挽柴吏目

奕世蓮花幕人稱漢吏師都緣參贊重頗覺轉遷遲雅論非三語清聲是四知猶餘前案牘長作後箴規

挽章處士

定海人晚年好道

流年驚逝水世事逐飄風卜築鄰蓬島移家類葛洪丹還金鼎伏劍解玉棺空惟有松壇月通宵貫彩虹

挽脩竹處士

處士遺型在鄉鄰久未忘冰霜餘節操雲錦見文章散帙依朝爽移樽坐夕涼見孫皆玉立尤足繼遺芳

寄鄉親濟陽公

武昌蔡啟任浙江等處行中書省參知政事諡贈三代公爵

身遠鄉情重途窮客病深參苓頻在眼桑梓最關心居簡便夷俗含淒效越吟自從遭喪亂辛苦到如今

登北固山多景樓

風月無邊地乾坤有此樓城隨山北固潮蹴海西流眼界寬三島胸襟隘九州階前遺硯石誰復話安劉

幽期

何處赴幽期青林白谷陞谷虛秋氣早林茂曙光遲談
罷風生塵歌闌月在巵謀身良自足何補國安危

次友人張孟善承贈以詩韻

去去成長往悠悠事遠遊躡雲雙短屐載月一虛舟江
海魚龍夜山林鶴鶴秋誦君佳麗句慰我別離憂

春日海村三首

地僻囂塵遠人稀習俗淳花時恒獨往隨意踏晴春班
竹過頭杖烏紗折角巾蕭然多古意何愧葛天民
門巷絕輪蹄春深綠草齊風光不相負泉石且幽棲捲
幔通花氣移牀避燕泥時時得佳句自向竹間題

每恨韶華晚仍嗟老病催閉門花落盡隱几鳥飛回引
睡書千卷消愁酒一盃平生志士氣此日孰相恢

寓慈湖僧舍次龍子高提舉韻

迢遞過蘭若淹留爲竹林疎鐘雲嶠迴孤燭雨窗深長
嘯非懷昔狂歌豈避今祇緣諸漏盡不受一塵侵

慈溪度夏報國寺寄甬東椿上人

一徑野雲深僧闕綠陰雨腥龍出澗風勁虎過林澹
泊資禪味清涼養道心三生如不昧石上一來尋

涵清軒

爲慈溪懋上人作

止水纔盈掬涵空有底寬玉壺秋影淨金鏡曉來寒落

月斜沈白流霞淺浴丹上人方宴坐應向觀中看

贈李仙姑

何年萼綠華來降地仙家花擁青鸞節香隨白鹿車清輝迴雪月玄想結雲霞不赴瑤池宴桃開幾度花

贈濟古舟

久留句踐國同寓給孤園聊發溪頭笑何殊石上魂臥雲秋對榻敲月夜過門願奉三乘法常依兩足尊

送二僧往浣花草堂度夏

濟古舟新古銘二公皆浙東名僧也

吟遍赤城霞行行入浣花為人無芥蒂留客有瓜茶寂寂先賢宅堂堂古佛家老懷因二妙亦欲製袈裟

題宋貢士袁庸死節傳後

四明人

始獲鄉闈薦俄驚國祚傾丹心回日馭赤手抗天兵自可敦衰薄何煩較死生文山嘉傳在端合附高名

送定海許縣丞

蛟門佐邑滿南去候庭闈雨露隨花綬雲霞避綵衣賢聲今已著色養舊無違萬里滄溟月清秋作伴歸

送鄞縣鮑秀才

貧病吾何有深慚鮑叔知可堪遲暮日飜值別離時霜月栖烏府風雲浴鳳池壯遊如得意音問莫教違

題湖山獨步圖

爲葉處士作

杖屨湖山外悠然與世違水邊延月上巖際待雲歸隨
鹿過樵徑看鷗到釣磯只今瞻畫像猶想挹清輝

慈谿歸隱

為馮子木大尹作

舊隱慈谿上歸休足自怡水翻琴上曲山送畫中詩叢
菊秋容淡孤松畫景遲依然對猿鶴無愧北山移

題四明倪仲權處士像

松間新雨過清覽出亭皋雲逐青驄馬風生白苧袍幽
懷隨地遠詩興與秋高囊錦歸時重應知從者勞

題介石齋

為四明倪克介作

介石存中正能為逸豫防礪金緣最勁攻玉豈徒剛貞

德南山配神機北斗當補天應有待五色爛文章

題筠軒

為定海胡處士賦

種竹繞前楹年深勁節成薄雲通雨氣清夜動秋聲魚
豕空遺簡鸞凰合度笙往來三逕熟不負歲寒盟

漁村書隱

為四明李處士賦

彼美藏脩者為漁住海鄉傍沙觀鳥跡臨水映螢光舟
楫須經濟絲綸擬對揚得魚供色養綵服日升堂

靜樂齋

為寧都鄒處士賦

寂寂幽棲地無營足自怡清泉流道脉白月淨詩脾每
到忘機處翻為得意時豁然成猛省太極是吾師

勉濟國諸郎

濟國諸公子風標各擅場青陽生玉氣白日隱珠光
閱家聲重詩書世澤長直須同素志早為繼遺芳

挽四明樂仲本先生

被誣寃死京獄

斯人嗟已矣吾道轉消沈文物招前古功名困至今
空山方泣玉同舍忽誣金白首號天處飛霜六月深

又

昔訪幽棲地論文十日還圖書花竹裏窻戶水雲間
一別成干載孤魂隔萬山裏難吾老矣東望涕長潛

武昌南湖度夏

南浦幽棲地當門罨畫開青山入雲去白雨渡湖來
石澗生龍氣川光媚蚌胎芙蓉三百頃何處著炎埃

題鵠山書堂

為進士奚仲英作

已為蟾闕彥仍就鵠山居綵服晨供饌青藜夜照書
寒香三徑小清籟四窻虛仕學俱優日承明別有廬

送章彥端赴夔州太守

春雪徧林臯清寒襲緼袍題詩送賢守呵凍強揮毫
別思巴江永才名蜀嶺高文翁嘉政在化俗莫辭勞

送儒士伯堅赴會試

天子興文治春官策譽髦魚龍爭變化麟鳳並遊遨
玉

殿紅雲合金門紫氣高臚傳稱第一宮柳映恩袍

寄定海縣丞張允達

幽興日相關應知吏事閑哦詩松竹裏問俗水雲間蜃
氣煙中海猿聲月下山蓬萊常五色有待蓬仙班

挽繆將軍

大將捐公館哀音徹帝廷殞星芒角赤馭日簡編青禮
賻膺天眷佳城獲地靈唯餘馮異樹寂寞倚園亭

挽唐都事

十年滄海上辛苦贊戎機帷幄籌雖在轅門事已非黃
金從百鍊白璧竟全歸生死俱無憾千秋仰德輝

客懷

浮生何坎壈終歲客他鄉病骨驚秋早愁心入夜長文
章非豹隱韜略豈鷹揚磨滅餘方寸還同百鍊剛

病衰

病骨秋增痛衰容日減華臉霞憐竹葉鬢雪妬菱花往
事嗟何及歸程望轉賒少年歌舞地此日屬誰家

五言古選

秋藻

綠水出紅蕖清麗世無比旭日照新粧盈盈明鏡裏亦
有後時者悽然抱孤蔬欲開風露寒寂寂含香死

梅林書屋

為四明陸秀才作

陸郎好脩士讀書梅屋下冰雪共清寒風月同瀟灑彈琴聊對花調鼎須待實豈無松竹交歲晚為三益

題畫

連翠障開雨挾銀河瀉中有澹蕩人於焉結茅舍朝
曲水濱暮獵平林下危途策羸驂汨汨胡為者

又

荒荒野日低漠漠江雲冷喬林延暮光澄波浴秋影高
人千載懷乾坤一漁艇

奉懷九靈先生就次其留別舊韻二首

晴霞麗層霄淑景媚清曙冉冉草際煙盈盈花上露幽禽何處來飛鳴入庭樹不見心所親坐待停雲護
攀桂月扶踈撫松雲陸離豈無淡蕩懷亦有幽貞期何緣對清景孤坐度芳時故人不可見新交非所知

歲晏百憂集二首

歲晏百憂集獨坐彈鳴琴琴聲久不諧何以怡我心拂衣出門去荆棘當道深還歸茅屋底抱膝梁父吟
歲晏百憂集擊節發商歌商歌未終調淚下如懸河故鄉渺何許北斗南嵯峨有家不可歸無家將奈何

悼亡

別時如玉人歸來死生隔日暮泣孤墳音容杳難得惟
餘墳上草猶帶羅裙色

湖上二首

鴛鴦湖中飛還向湖中落不比薄情人天涯并海角
汀鷺映湖波清白兩無愧立盡風雨寒頗爲口腹累

五言長篇

長嘯篇

惟遠度可量惟暗燭可照丈夫窮達際安可以逆料區
區井觀天擾擾管窺豹衆論徒沸騰誰能領其要韓信
出胯下市井皆哄笑范睢置廁中醉客更相溺一朝佐

秦漢將相無同調聲名六合馳事業九天耀平生怨與
恩歷歷加顯報以馬飼故人以尉乞惡少是非姑置之
仰天發長嘯

挽倪仲權處士

維鄞有高士乃居城北門伯叔列茅土弟昆羅摺紳先
生視富貴蔑若行空雲蕭然坐一室詩書日討論忠信
化閭里孝友敦親姻用茲以歿世人亡道彌尊我昔客
東海託交見天真犖犖金石義藹藹骨肉恩豈意隔生
死相思勞夢魂尙憐靈鳳毛符彩備五珍每過話疇昔
相對淚沾巾我悲匪兒女所感在斯文

贈劉全真

峨峨崆峒山去天不盈尺西挹弱水流東掛扶桑日中
有學仙人眉白雙眼碧食霞衣雲霧凝神鍊精魄獐龍
及猛虎視之如蟻蝨功成朝紫皇名隸丹臺籍幡然汗
漫遊飛行隘八極滄海重揚塵蟠桃幾結實天上與地
下俯仰成陳迹歸來斂衽坐倒卷入冥寂萬象吾肺腑
四氣吾嘘吸乃知大還資不離嬰兒質蚩蚩世間人斲
喪良可惜

觀鄭高士坐園

疑身危石踞屏息遊絲搖電光射玄關龍虎聲咆哮天

君寂不動萬象俱來朝甘露降瓊田五色發靈苗何必
入青冥然後為逍遙

風泉清聽

為文極禪師賦

幽棲空谷中石室如懸磬坐閱造化機動靜互相勝風
生萬籟隨雨過百泉應蕭蕭亂踈鐘泠泠隱清磬虎嘯
山月昏龍吟海波靜上人謝聲塵悠然入深定喧寂兩
俱忘是乃名真聽

白雲精舍

為諸賢上人作

白雲何處來油然在巖岫下有古精藍凌雲起華構吐
吞金碧輝隱見林泉秀常從護法龍低接噴香獸覺花

映益明忍草滋逾茂高僧亦無心怡悅坐清晝安得乘
長風遍界陰涼覆法雨澤羣生普使躋仁壽

贈秋月長老

秋月既虛明禪心亦清淨心月兩無虧炯然大圓鏡流
光燭萬物萬物咸鮮瑩倒影入干江干江悉輝映情塵
苟不掃倏忽迷真性所以學道人于此分凡聖視身等
虛空無得亦無證偉哉寒山翁與汝安心竟

鱸菴

鄞江張孟善氏貌古性方好直言慕王陵汲
黯之爲人與俗多忤因扁其所居之室曰鱸
菴以自况室傍別開小圃圃中無花卉蔬果之
冗唯植藥數畦以資鄰里之貧病者其友西域
鶴年取古史苦言藥也之遺意作
鱸夫治藥圃詩以貽之其詞曰

小圃不盈畝偏側背江郭種藥有鱸夫庵居甘澹泊參
苓充服食杞菊成帷箔抱甕不辭勞荷鋤寧改樂平生
慕陵黷直道盡譽謬固知逆耳言卽是瞑眩藥世無狄
公籠誰收治民瘼何須持方柄齟齬納圓鑿余亦種瓜
人歲晏同盤礴

送赤土磯巡檢徐白任滿

人生天地間忠孝理最大之子知所先秉之若圭玠小
試弓刀職長懷襁褓恩由來忠薰士多出孝義門便便
善辭令濟濟習容止忠孝苟不立絺繡加大豕羨子負
才氣玉立當青春一飯不遑暇志在君與親桓桓領壯

夫赫赫巡大邑鴟張悉就擒鼠竊亦屏息耕桑各安堵
老稚春風中瓜期忽已屆入謁蓬萊宮車騎挽莫留別
我大江側臨歧欲贈言老病多慚德青雲賢路開俊又
俱登庸自此躋膺仕母忘孝與忠

題碧梧軒

爲胡公
鼎作

威鳳出羽族乃爲王者瑞飛翔九千仞覽德斯一至和
鳴周室興來儀舜廷治高軒植此梧萬一幸而致慨然
千載懷孰敢謂不智柰彼積石遙往來良不易先生人
中鳳文章五色備肯作朝陽鳴亦足瑞斯世

贈醫士樂孟傑

越人有至鑑明德以爲基視疾洞表裏談笑驅三尸神
聖不自居託以飲上池今人重勢利晝夜營已私心志
先蠱惑仁術何能施缺十
三字廉士天錫仁壽資蚤歲失所
怙長懷罔極悲力學岐黃術百歲奉慈闈朱顏映華髮
和氣春熙熙因推老老意遂及親與知東鄰抱膏肓西
里困瘡痍刀圭一入口沈痼忽若遺樂也無德色賢聲
日四馳越人久羽化緒言百世師今古不二致樂也其
勉之

五言排律

題竹

太守兄階下新竹數竿秀色鬱然可
愛索予賦詩敬製長律一十八韻

蘇詩母未塵

丁孝子詩集卷一

七

楚楚新移竹脩脩已出林渭川元接葉淇水本聯陰旣
忝軒墀重應蒙雨露深芝蘭方並植荆棘敢相侵有荷
栽培力無漸變化心長身龍天矯密羽翠蕭森委砌風
飄錦篩庭日布金奇材仲連箭雅韻伯牙琴歛乃歌頌
度平安問每臨風雲今自飽冰雪舊能任豈獨松梅友
仍多草木欽琅玕擎使節玳瑁合朋簪直可扶衰老真
堪載古今釣鼇期大用引鳳壓羣音詞客題詩到幽人
載酒尋煙旌朝冉冉月纍夜沈沈展席臨秋水鈎簾對
夕岑清風驅酷暑一爲豁煩襟

逃禪室述懷一十六韻

出處兩茫然低徊每自憐本無經國術仍乏買山錢故
邑二千里他鄉二十年力微歸計杳身遠客心懸桃李
誰家樹禾麻傍舍田鶉衣秋屢結蝸室歲頻遷逝水終
難復寒灰更不然久要成齟齬多病復沈綿俯仰衷情
倦棲遲野性便延徐誰下榻訪戴獨回船耻洒窮途泣
間脩淨土緣談玄分上下味道悉中邊有相皆虛妄無
才幸苟全棲雲同白鹿飲露效玄蟬高蹈漸真隱狂歌
愧昔賢惟餘空念在山寺日逃禪

題西圃卷

爲蕪湖辛
順中作

坐閱桑田變歸爲菽水謀聊從西圃隱少慰北堂憂汲

月滄江曉鋤雲沃野秋新蔬和雨摘碩果帶霜收嘉樹
巢烏鳥閑庭下白鷗管寧金不顧李路米應求千載誰
同調東陵有故侯

送鐵佛寺盟長老還襄陽

盟居襄陽父死方在殯
遇亂奉母逃難江南餘
三十年嘗典藏鑰於蔣山主武昌鐵佛寺而重
興之及今道路既通乃奉母北歸而葬其父喪
士大夫以為方外所未有成作詩文美
之鶴年因製五言排律一十韻附卷末

襄漢揚波日江湖避地時行行隨老母處處禮名師雲
水元無住風塵信所之睦州勤奉養江革備艱危掌鑰
鍾山下傳燈鄂渚湄剩翻龍藏典幾詠鶴樓詩深慨叢
林廢真成一木支銅仙頰閱世鐵佛重開基法几雕文



具靈旛刺絲絲雲鐘晨縹緲月殿夜參差已悟無生法
還興罔極悲他鄉流徙遠先塋奉遷遲頽洞此下原本
缺四字
歸故可期望雲雙淚瀉計日寸心馳官柳催飛錫曇花
侑奠儀既明埋玉理豈是繫珠癡定應眠牛兆母生觸
鹿疑春暉憐舊線秋露薦新祠生死俱無憾諸方起孝
思

靜樂

靜樂者章貢處士鄧翁之齋號也翁已仙去
其子尚忠尚信不忍死其親求士人詩文以
詠其潛德予重二子之事死如事生也
製五言排律十韻寄之以慰其孝思云

高人嗟逝矣靜樂尚求詩豈意無為道翻成罔極悲二
難勤繼述一默付希夷飲水心愈潔看山意更遲傷烏

營塚日弔鶴造廬時霜露增新感煙霞遂宿期閉門春
事去隱几午陰移未墜青雲志仍工白雪詞每憐司馬
病深忝叔牙知慚愧無佳句緘題慰孝思

歌行

送武昌知縣潘公考滿

依依武昌柳灼灼河陽花看花思善政折柳送仙槎樊
川令尹今潘岳下車朝夕詢民瘼三年德化藹如春政
成仍與民同樂值今考績朝玉京雲開天霽飛鳧輕褒
德曾聞封卓茂自古朝廷重老臣河陽花武昌柳勿翦
勿伐公知否邑人愛護比甘棠一歲春風一回首終

藝海珠塵

南漚 吳 省蘭 泉之輯

仁和 陳 琨 淮玉校

丁孝子詩集

卷二 丁鶴年簪

卷二 七言古詩 七言律詩

黃鶴樓

半空金碧何代樓仙人鶴駕曾一遊雕檻看雲楚山曉
珠簾捲月湘江秋樓前雲月長無恙禰賦崔詩角清壯
西風忽動庾公塵仙人仍歸九天上

藝海珠塵

丁孝子詩集卷二

植樗軒為天台吳處士賦
徂徠蒼松榦嶧陽孤桐枝矯矯臥龍節娟娟棲鳳姿
桐中琴瑟松棟梁采之斲之生輝光明堂清廟卽登用回
首故山雲路長鳳凰不來龍亦去樗散當軒承雨露

贈元溟鍊師

神仙中人毛外史方瞳深碧虬髯紫了知大道本無爲
况是谷神元不死偶因救旱驅元溟倒瀉銀漢如建瓴
功成不居拂衣去洞庭渺渺君山青

贈相工宋忠臣姜才之孫姜奉先

德祐忠臣好孫子爛爛目光巖電紫人間富貴等浮雲

瑣瑣何煩掛脣齒灑灑瀕險蜀道難曳裾傍人多厚顏留
取乾坤雙老眼夕陽牛背看青山

紫芝山房為四明處士夢紫芝生於別墅因置墓廬

先翁胸中有丘壑預築園亭向山郭清宵忽夢紫芝生
地靈獻瑞真佳城只今諸孫仍肯構風姿眊眊如芝秀
一門朱紫自此升始知吉夢爲休徵始知吉夢爲休徵
千載無慚下馬陵

雙溪草堂為敘南游克成先生作堂之側有琴蓋山雙溪出其下繞堂而來

曰琴曰蓋皆名山雙溪袞袞來其間玉龍齊驅繞地軸
青鸞並翥朝天關草堂先生足風致擊空明兮攬空翠

英才樂育貢春官始識先生仁且知

贈戴原正

戴生眼如電讀書夜忘眠清晨盥櫛罷起居慈母前母
身康寧子心喜讀書還向書帷裏綴文調餽秋復春鳳
凰符采騶虞仁天心一回四海平治明堂掄材清廟需
器棟梁瑚璉寧汝棄

離鸞篇

為四明張孟善祖母祝節婦而作

孤鳳病且死聘鸞以為偶引頸嗚嗚託其後鸞對以臆
肯以首惡烏啄其雛飄風撼其巢伏育補葺鸞不辭勞
雛日以長能反哺巢日以廣多牖戶天錫壽考既和且

平每一對鏡猶復悲嗚始終德義俱無愧乃知鸞鳳所

以為世瑞

胡節婦

一自失良人年年不見春常時折花處青苔滿行路卽
今垂老百事非篋中惟有嫁時衣姑終養子成立望夫
差勝山頭石
樂節婦
茶蓼未為苦薑桂未為辛纍纍苦者無若未亾人欲
隨世苟活生則同室死同槨欲殉夫並俎阿婆方老兒
方孤朝養姑暮教子泉下良人猶不死

送周侍郎定江漕賦稅還大都代杭城父老作
戈甲三邊靜車書四海同時平尙文治策士明光宮龍
沙公子清且美玉立芙蓉照秋水前席才名賈誼賢出
關氣槩終軍偉恭捧帝符臨下方卿雲五色分天章星
輶小駐武陵驛炎海六月生清涼宣朝廷德意問閭閻
疾苦遊民亦占籍編戶悉按堵力役均平賦斂輕去者
謳歌來鼓舞觀風采謠乃使之職任賢使能惟帝之德
目擊盛事豈容緘默乃歌曰生逢舜日當堯天經營內
外皆英賢八十衰翁百無補茅簷擊壤歌豐年

題餘姚葉敬常州判海堤卷

補先兄太守遺缺

陰霓夜吼風雨急坤維震蕩玄溟立桑田變海人爲魚
葉侯訴天天爲泣侯奉天罰誅妖霓下平水土安羣黎
嶙峋老骨不肯朽化作姚江捍海堤海堤蜿蜒如削壁
橫截狂瀾三萬尺堤內畊桑堤外漁民物欣欣始生息
潮頭月落啼早鴉柴門半啟臨瀕沙柳根白舫賣魚市
花底青帘沽酒家花柳村村各按堵世變侯仙倏成古
侯雖已矣遺愛存時聽叢祠咽蕭鼓人生何必九鼎榮
廟食貴有千載名君不聞一杯河水決瓠子沈馬親勤
漢皇祀又不聞一帶江波泛蜀都刻犀厭勝秦人愚江
平河塞世猶駭何況堂堂障滄海論功不啻濟川才砥

柱東南千萬載嗚呼只今四海俱橫流平地風波沈九州
蒼生引領望援溺州縣有官非葉侯州縣有官非葉
侯禦災誰復憂民憂

書揭祕監所撰李處士墓銘後

為孝子李思親作

亭亭高岡松上有雙棲烏朝出營其巢暮歸哺其雛雌
雄和鳴尾畢通巢成雛長烏雙俎月明夜靜雛影孤南
飛繞樹聲號呼西溪之澗南山之隅銜土為墓口卒瘞
蓬萊老仙憫其慈孝俱錫以五彩鳳凰羽徑寸驪龍珠
光芒晝夜燭墓廬哀哀旣慰情始舒振迅羽嗣思天衢
故巢歲晚牖戶虛飄飄風雨無時無纏綿補葺良艱劬

君不見秦家桂樹空扶疎高枝卻使鴟梟居

環翠樓歌

為餘姚道士梁公作

大山摩穹霄小山翻洪濤或翔丹穴鳳或舞寒江蛟奔
騰起伏奇觀不可狀雲錦屏風金碧障中有仙家太古
壇烏啼花發春自閑子晉鸞笙乘月過王喬鳧舄凌雲
還環翠樓開紫霞裏更揖雞峰朝舜水千巖秀色傍牕
浮萬壑濤聲從座起煙消日出天溶溶玉壺倒插金芙
蓉鈎簾相對坐長夏洒然冰雪生心胷君不見天台嵯
峨四萬八千丈若非臙車羽輪那得止又不見終南盤
亘中原五百里天梯雲棧懸絕那可履何如羽人高居

環翠樓調笑日月輕公侯仙韶靈響每坐聽日觀霞城
時臥遊還丹鍊就顏如玉讀書學道日不足琅函金檢
五千言錦帙牙籤三萬軸星爲冠兮霓爲裳或參麒麟
翳鳳凰翩翩上遊白雲鄉手把絳節朝紫皇鈞天九奏
賜霞觴醉乘冷風還下方眼空四海小八荒層樓棲真
壽而昌此名此境孰敢當藍山道士身姓梁

送僧淨皓書童正思所作詩序後

童郎豪爽士平生少許可獨於皓上人珠璣發咳唾上
人學法英妙年叅遍諸方文字禪鐵鞋踏破石頭路教
外方知別有傳童郎我同道上人我同鄉相逢江上折

官柳離思悠悠江水長

送鐵佛寺益公了庵朝京遊浙

世尊出西域教化極東土大道本無爲盛德人所慕只
今滅度二千年授經弟子如親傳我生懶僻苦貪佛或
謂三生有勝緣武昌鐵佛古名刹兵燹薦臻孰承乏益
公崛起振宗風至味啗人如嚼蠟相逢一笑卽相親下
榻東軒忘主賓薰爐茗椀坐清夜從容軟語溫如春曉
來別我朝京國短策輕包適吳越吳越山水天下奇寶
坊舍利皆人傑公今叅訪必遇人大根一掃無纖塵錢
塘潮音華頂月獨露堂堂見本真從此平生大事畢頓

覺身心樂無極，踢翻大海水。逆流半夜中，天出紅日我。
有故人僧中，雄不遠千里來。詩筒煩公問訊，向何處說。
法今留兜率宮。

送蔡士廉舍人奔訃還四明

公家東海濱，我昔共鄉縣。今同寓鄂渚，十年不一見。公
從藩府典禮儀，入侍須早出。每遲不將汎愛，要鄉譽直
以孤忠結主知。雪松貞操寒逾勁，冰蘖清聲老更馳。府
中諸彥皆人傑，政事文章稱一絕。重公質朴古人風，平
揖下堂要磬折。身名俱泰心獨悲，甘旨親庭千里隔。一
朝海鶴寄雲槭，阿翁已作蓬萊客。仰觀喬木戰飄風，五

丙分崩面深墨，我聞往弔始見公。我足踣跚公髮白，相
看話舊重咨嗟。少日風流那復得，花明春泛越王湖。月
皎秋尋賀公宅，賞花弄月秋復春。詩酒清狂多故人，直
倚青年驕白日。豈知碧水揚黃塵，從此東西各星散。我
憶同遊如夢幻，秋風江上漫思鱸。夜雨關河愁聽鴈，公
當大事賜告歸。片帆東下孤雲飛，里中長老久相待。一
見喜極還沾衣，僕問題詩者誰子。道卽遼東丁令威。

送奉祠王良佐奔訃還兗城

竟爲禮儀鄉，自昔多名士。佐也游夏徒，力學能崛起。三
冬文史富才華，萬言入對天。王家騎蟾秋折廣，寒桂走

馬春看長安花承恩筮仕御史府風生臺閣膺僉舉雅
知嚴敬授祠官奉禮山川來大楚祠宮清暇日有餘焚
香危坐讀父書門外猶維桓典馬釜中屢出菜蕪魚嗟
子老病衡茅下時人棄置如土苴多公高義數相過茅
塞心胸賴陶瀉霜風一夜吹庭闥椿萱並瘁色養違再
拜玉宸潛涕出千里看雲匍匐歸佳城已卜牛眠地屏
列泰山帶圍泗種松菴土展孝誠傍水依山礪仁知知
明仁熟政乃攻終喪還謁蓬萊宮致君堯舜付公等侍
令四海回淳風五風十雨年屢豐吾何幸爲田舍翁

送奚仲瑛進士服闋朝京

奚郎健筆凌高秋排雲直上蟾宮遊一枝丹桂許先折
歸來兩袖天香浮早年掄材服官政百里秋毫歸藻鏡
躬承天語佐夏官幕下清談烽燧靜家書忽報丁內艱
讀禮還依孔子山教育英才樂人樂一旦徵書到巖壑
鯤鵬從此徙南溟鳳凰仍舊巢阿閣

望雲思親圖

爲王大
使作

山人愛雲不離山巢居只在雲松間枕泉漱玉弄明月
此心直與雲俱閑達官愛雲雲作侶平步青雲稱高舉
天瓢一滴慰蒼生大旱用汝爲霖雨王公出處與此二
者殊十年遊宦感離居衣上猶存慈母線手中長把巖

君書日日看雲不遑暇爲有吾親舍其下恨身不得逐
雲飛卻寫飛雲入圖畫公餘展翫疑心神見雲如見吾
雙親卷圖仍寄吾親舍永奉高堂長壽身狄公盛事王
公繼今古孝思同一致

竹林書屋

爲脩江土
伯厚作

王郎高標絕塵俗牽茅自結清風屋屋中充棟積古書
屋外循簷種脩竹離離實垂珠森森笋抽玉鸞鳳食有
餘虎豹文亦足時時把書卷自向竹下讀禮義深服膺
聖賢常在目王郎學道今有年半是臞儒半是仙清脩
酷與此君似中通外潤直且堅平生不作桃李媚歲寒

風節恒凜然不隨沈湎唐六逸不效曠達晉七賢淨掃
仙石壇焚香究玄玄客來不交語共坐蔚藍天蒲輪他
日訪幽側以道匡君流惠澤功成太史不一書卻汗青
書爲簡策

七言律詩

兀兀

數莖白髮鏡中新兀兀窮年愧此身萬里雲霄雙倦羽
千尋江漢一窮鱗望鄉薄暮憑西日去國中宵禮北辰
客路漸遙身漸老此生何以報君親

勞勞

蘇東坡集

丁孝子詩集卷二

八

閭闔排雲事已休，勞勞猶耻爲身謀。
數莖白髮未爲老，一寸丹心都是愁。
燕代地高山北峙，荆揚天闊水東流。
英雄已去空形勝，劍氣中宵射斗牛。

元夕

燈火樓臺錦繡筵，誰家簫鼓夜喧闐。
光移星斗天逾近，影倒山河月正圓。
金鎖開關明似晝，銅壺傳漏迴如年。
五雲不奏霓裳曲，空使揚州望眼穿。

脫太師

淮海重聞斧鉞臨，一時黎庶盡傾心。
雷霆聲播天威遠，霖雨恩添帝澤深。
暗室有蠅污白璧，明廷無象鑄黃金。

風塵未息英雄死，坐對江山慨古今。

斬公子

中朝公子多才俊，瀟灑風塵獨斬侯。
白鴈久無天上信，黑貂漸敝雪中裘。
虛堂簾影遲遲晝，別館燈光淡淡秋。
到手深盃須劇飲，醉鄉消得古今愁。

故宮人

粉愁香怨不勝情，強整殘粧對老兵。
別殿金蓮餘故步，後庭玉樹變新聲。
眼穿鴈字雲連塞，夢斷羊車月滿城。
天上桃開王母去，世人誰識許飛瓊。

別帽

雲樣飄蕭月樣團百年雄麗壓南冠黃金綴頂攢文羽
白璧垂纓間木難刺繡尙期平敵壘簪花曾夢舞仙壇
一從吹墮西風裏誰念蒙塵白髮寒

雪後泛東湖

雪後湖山玉作圍小舟乘興弄清輝貪看月裏鸞回舞
不覺風前鷁退飛雲母屏空春閨寂水晶宮冷晚霏微
仙家一笑乾坤老誰馭瑤池八駿歸

梧竹軒

爲鳳浦方氏作

鳳鳥曾聞此地過至今梧竹滿北阿正懷翦葉書周史
卻恨翻枝入楚歌金井月明秋影薄石壇風細晚涼多

中郎去後知音少共負奇材柰老何

九靈山房圖

爲戴先生作

九靈別業何年到聊作新圖寄所思幽谷白雲晴窈窕
高簷翠樹曉參差輞川已入王維畫韋曲仍傳杜甫詩
只尺相望成萬里臥游心事許誰知

二靈寺守歲

守歲山房迴絕緣燈光香爇共蕭然無人更獻椒花頌
有客同叅栢子禪已悟化城非樂界不知今夕是何年
憂心悄悄渾忘寐坐待扶桑日麗天

元旦寄朝真宮諸道侶

窮陰殘臘喜全消，淑景新正覺倍饒。
一氣挽春回厚軸，五雲扶日麗層霄。
媚時久厭銀幡巧，卜歲深期玉燭調。
最愛羣仙持絳節，朝真不憚九天遙。

暮春感懷二首

杜宇聲聲喚客愁，故園何處此登樓。
落花飛絮成春夢，剩水殘山異昔遊。
歌扇多情明月在，舞衣無跡綵雲收。
東皇去後韶華盡，老圃寒香別有秋。
四十無聞懶慢身，放情正壑任天真。
悠悠往事杯中物，赫赫時名扇外塵。
短策看雲松寺晚，疎簾聽雨草堂春。
山花水鳥皆知已，百遍相過不厭頻。

奉寄王宣慰兼呈九靈先生

別館新成足宴遊，珊珊環珮總名流。
獨推南郭爲高士，共識東陵是故侯。
天上鶯花三月夢，人間風雨五更愁。
行藏盡付浮雲外，爛醉豐年黍稷秋。

奉寄九靈先生四首

先生嘗爲予作傳

挾海懷山謁紫宸，擬將忠孝報君親。
忽從華表聞遼鶴，卻抱遺經泣魯麟。
喪亂行藏心似鐵，蹉跎勲業鬢如銀。
萬言椽筆今無用，閑向林泉紀逸民。
花柳村村接海濱，攜家隨處避風塵。
衣冠栗里猶存晉，雞犬桃源久絕秦。
對坐青山渾不厭，忘機白鳥自相親。

也知出處關時運豈但逃名效隱淪
早將長策靖三邊晚抱孤忠守一廛出處久推張翰達
登臨重覺謝安賢烟霞正壑龍山屐風月汀洲鳳浦船
東望三神纔只尺不妨來往挾飛仙龍山鳳浦皆海濱地名
清泉白石兩翛然仙隱何妨日似年頗厭文章妨大道
卻從奇耦玩先天雲間犬舐燒丹鼎雨裏龍耕種玉田
終歲不聞城府事閉門閒著養生篇

寄定海故將軍邵公輔

往事浮雲杳莫攀壯懷未展鬢先斑不聞奉使通銀漢
空見將軍老玉關故壘荒涼干騎盡滄溟浩蕩一鷗閒

風塵隨處嚴訶止愁殺田間野獵還

逃禪室與蘇伊舉話舊有感

不學揚雄事草玄且隨蘇晉暫逃禪無錐可卓香巖地
有柱難擎祀國天謾託丹霞燒木佛誰憐清露泣銅仙
茫茫東海皆魚鼈何處堪容魯仲連

寄餘姚滑伯仁先生

獨木橋邊薜荔門全家移住水雲村猿聲專夜丹山靜
屨氣橫秋碧海昏詩卷自書新甲子藥壺別貯小乾坤
陶漁耕稼遺風在差勝桃源長子孫

寄餘姚宋無逸先生

餘姚有舜江夏山漢劉使君樊夫人仙跡

龍泉城外絕囂喧寄傲全勝在漆園獨對江山懷舜禹
每憑風月問劉樊行窩醞酒花圍席野寺題詩竹滿軒
回首崑岡空劫火深期什襲保瓊璠

雨中寄楊彥常先生

山中長夏苦淫雨暫爾出門還不能九天馭日力已竭
兩地看雲愁倍增憐君畏途久作客笑我淨社常依僧
相思倚柱發清笑旁人不解谷空鷹

贈李全真

名止水故威順王門人也

玄元孫子玄都客汗漫長遊宇宙間黃鶴白雲迷鄂渚
青牛紫氣滿函關袖中寶劍雌雄合鼎內金丹大小還

不見吹笙王子晉秋來幾度候緱山

題太守兄遺藁後二首

太守兄死事之明年于篋中得遺詩一卷伏讀之次

不知涕泗之橫流也敬題二詩于後以紀哀思云

海國期年政化成肩輿隨處看春畊正欣雞犬無驚擾
詎意鯨鯢有鬪爭遙烏月明虛燕寢故山雲冷失佳城
夢回佳句難重得腸斷池塘草又生
黑風吹海浪如山獨跨長鯨去不還身世雲烟遊物外
文章奎壁照人間彤庭朝朔雙鳧遠綠野行春五馬閒
老我急難餘淚在一回撫卷一潺湲

逃禪室臥病有懷故鄉東諸友生

謀生失計倍淒涼扶病將歸自激昂那得金丹生羽翼
只將鐵石作肝腸日長獨臥維摩室歲晚全荒陸氏莊
幸際諸公各當道應思孤客久迷方

兵後還武昌二首

避亂移家大海隈楚雲湘月首頻回歸期實悞王孫草
遠信虛憑驛使梅天地無情時屢改江山有待我重來
白頭哀怨知多少欲賦慙無庾信才
亂定還家兩鬢蒼物情人事總堪傷西風古塚遊狐兔
落日荒郊臥虎狼五柳久非陶令宅百花今豈杜陵莊
舊遊回首都成夢獨數殘更坐夜長

夢得先妣墓

已未夏五月還武昌遷葬兵後陵谷
變遷先妣封樹竟迷所在久尋不得

露禱大雪中冬十一月二十日夜忽感異
夢翌日遂得其處賦詩一首以記歲月云

慈顏幽翳杳難知風雪孤村遍訪之極浦空江泥滑滑
荒岡斷壠塚纍纍那知恍惚魂歸夜正是呼號淚盡時
孝格皇天吾豈敢聊同烏鳥報恩私

過九江追悼李子威太守

瓣香遙拜九江城太守精神日月明叔姪並歸忠義傳
江山不盡古今情潮回湓浦聲猶怒雲起爐峯氣未平
生死總魁天下士丈夫端不負科名

哭陣亡仲兄烈膽萬戶

獨騎鐵馬突重圍，斬將搴旗疾似飛。金虎分符開幕府，玉龍橫劍衛邦畿。委身殉國心方盡，裹革還鄉願竟違。病臥滄江憐弱弟，看雲徒有淚霑衣。

奉懷先師豫章周孝思先生

先生有道負清時，經濟何由見設施。白水青山聊自適，光風霽月復誰知。出塵標格三株樹，瑞世文章五色芝。鳴鳳不聞人亦去，生芻一束起遐思。

題昌國普陀寺二首

寺在浙江寧波府東南海島間，即昌國州之故墟也。

神鼇屹立戴崔嵬，俯瞰滄溟水一杯。積翠自天開，罨畫布金隨地起樓臺。祈靈漢使乘槎到，傳法胡僧折葦來。

若使祖龍知勝槩，豈應驅石訪蓬萊。

昆明劫火忽重然，宇內名山悉變遷。古刹獨存龍伯國，豐碑尤記兔兒年。三更日浴咸池水，八月潮吞渤海天。雲漢靈槎如可御，便應長往問羣仙。

寄見心長老二首

時陞住靈隱號天香老人

豫章老子最能文，禪海詞林總逸羣。弧矢機鋒天下避，圭璋聲價日邊聞。晝長經閣繙新鈔，歲晚詩壇策舊勳。自古靈山名勝地，幾多龍象望慈雲。上方借榻動經春，道義交情久更親。滌器每憐司馬病，卓錫不厭仰山貧。茶煙隔座論文夜，花雨霑筵聽法晨。

一自天香通鼻觀六根無處著纖塵

秋夜宿定水寺天香閣有懷見心長老

寂寂雙峯映澗流重來託宿敞雲樓窻涵虛白三更月
簾捲空青一色秋頗有高情酬勝賞可無奇句入冥搜
天風開遍岩前桂誰為烝香寄澹遊

梅南道人讀易圖

為四明陸都事賦

畫省歸來謝搢紳傍梅觀易最清真孤根下應先天氣
太極中含大地春傲睨乾坤雙老眼婆娑香影一吟身
歲寒莫問調羹事且作者英會裏人

方寸室

為而東故處士盛子賜以遺其子維學

道義謀生本自然何煩負郭更求田由來方寸留畊地

即是虛靈不昧天春雨既濡先澤遠秋風肯穫後昆賢

不忘種德辛勤意餘慶朝朝大有年

南湖漁隱

為故憲史徐子仁兄弟題

冰蘖同聲想二難南湖寄傲水雲寬並投清憲飛霜簡
對把滄浪釣月竿蟻夢無憑應易斷鷗盟有待竟長寒
卷中名勝多親舊三復遺文一永歎

瑞草堂

為慈溪孫原道兄弟賦

手種叢萱孝感深陽和隨見破窮陰侵凌雪色雙華萼
報荅春輝寸草心踈翠近分書帶碧嫩黃遙映壽觴金

忘憂坐對高堂晚更聽填篋奏好音

知歸庵

為四明董氏作

袞袞紅塵未息機斯人何事獨知歸青山不辨將來計
白髮徒嗟既往非谷口雲霞隨葛屨沙頭魚鳥識荷衣
自慚潦倒江湖表猶對旄工賦式微

九曲山房

夏母墓廬也

九曲園亭結構半畫圖誰為重揮毫蛟蚪起陸岩巒秀
風雨號空樹木高五夜神光通岳氣三秋明水薦溪毛
瀧岡墓表情何極手把柸椽淚滿袍

樊口隱居

為武昌李均玉作

萬里雲霄斂翼回掛冠高臥大江隈春深門巷先生柳
雪後園林處士梅翠擁樊山邀杖屨綠浮漢水映罇壘
誰能領取坡仙鶴月下吹簫共往來

巽江草堂

為章貢鄧尚志作

巽山環拱巽波涵瀟洒茅堂在蔚藍明月倒懸天上下
清風遠播地東南尋盟鷗鷺閑情適坐鎮魚龍老氣酣
最愛行藏兼吏隱詩成應擬百花潭

戲贈劉雲翁

千金不惜買新聲贏得風流老更成銀鬢葡萄浮臘蟻
金屏空窈窕春鶯香凝寢寢頻開席花暗閉房合度笙

長江萬里圖
從燕未終賓客醉莫將明燭照華纓

長江萬里圖

右逾越嵩左蓬壺萬里提封入壯圖斷石雲屯山擁蜀
驚濤雪立海吞吳蟠桃有實來青鳥若木無枝駐赤烏
秦漢經營人盡去獨留形勝在寰區

錢塘懷古

錢塘佳麗冠南州故國繁華逐水流龍虎已消王霸氣
江山空鎖古今愁吳臣廟冷潮喧夜宋主陵荒塔倚秋
最是西湖歌舞地數聲漁笛散鳧鷗

戲贈應修吉

硯溪居士神仙侶短髮蕭蕭雪滿簪暖老恨無燕趙玉
養生賴有坎離金牀頭酒熟留僧飲席上詩成對客吟
歲晚山空誰是伴北窗梅月最知心

重到西湖

湧金風月昔追歡一旦狂歌變永歎錦繡湖山兵氣合
金銀樓閣劫灰寒雪晴林野梅何在霜冰蘓堤柳自殘
欲買畫船尋舊約荒煙野水浩漫漫

水光林影圖

為簡翁作

知是平泉是輞川水光林影共悠然薜蘿涼映紛紛月
蘋藻清涵湛湛天微颺翠旗龍夭矯倒開金鏡鳳翩翻

此中真趣誰能辯吏隱雲間一散仙

水光山色齋

為前朝縉紳張勉夫作

新構茅齋絕世紛水光山色喜平分四窗涼湧玻璃月
一榻晴封紫翠雲鳥度畫屏迷遠黛魚吹清鏡動圓紋
往來半是漁樵侶閑話興亾坐夕曛

假館武當宮承舒庵贈詩次韻奉謝二首

一歸琳館卽逍遙無復驅馳混市囂載酒每承文士過
鬪茶頻赴羽人邀三清風露從天下五色雲霞匝地飄
匡坐不眠神益王靜聽笙鶴度中宵
去天尺五去人遙地位清高隔世囂祕閣校書多考索

初筵設醴重招邀每看賦雪才無敵便覺凌雲氣欲飄

枉騎敢煩臨暑夕挈舟或可候寒宵

公約來就宿時六月

次出翁中秋詩韻

西風黃鶴舊磯頭皓月中分此夕秋烏鵲無依頻繞樹
魚龍有喜競乘流煙雲盡捲天逾大河漢低垂地欲浮
擬買桂花陪勝賞老來佳句恐難酬

再用前韻

次年中秋翁在史館僕留鄂渚悠然興懷復用前韻以寄

庾公樓上鄂城頭乘月今為第幾秋大地長天俱並照
明河晦海各分流寒光下瀉方諸溢顛氣高騰沆瀣浮
不見故人吳季子百年清興若為酬

送奉祠康仲謙致仕還陝西

大國祠官致仕歸秋風祖帳足光輝青松黃菊先廬在
白髮蒼顏故老稀久奉山川諸祀典遠迎鄉黨識朝衣
家居重念君恩厚目送南來一鴈飛

送貝惟學武昌省親復還吳淞

黃鶴磯頭捲雪濤孝廉舟穩載時髦故廬先壟歸心切
慈母難兄別思勞千里萼羹宜具饌三秋菊酒稱題糕
到家正及登高會瀟灑誰同白苧袍

送人使高麗

文物中朝宰相家聯芳五桂至今誇百年重喜孫枝盛

萬里遙瞻使節華鳴谷宵分賓日馭天河秋早候星槎
朝鮮自昔知才辯佇見勲名被邇遐

秋素軒為涂以諒賦

新涼夜透讀書帷瀟灑軒居素景宜黃菊有香風瑟瑟
白蓮無質月遲遲垂綸水檻沙鷗狎步屨柴門野鶴隨
除卻天光與雲影更無一物在襟期

次韻陸伯暘梅花詩

小車厭看洛陽花夢想林逋處士家十里湖山春淺淡
一枝雪月夜橫斜孤高不受金尊賞清冷無煩錦帳遮
今日重吟香影裏百年風致未為賒

挽衛知事胡公鼎二首

江海論交四十年故家文物羨君賢
燈前夜雨書連屋花下春風酒滿船
舍瑟肯居曾黜後著鞭寧讓祖生先
他鄉重會清歡極俄送輜車一泫然

自構幽軒倚碧梧琴樽時復集名儒
一官迢遞來黃鶴五夜悲涼夢白駒
盛有良籌遺細柳可無高義致生芻
孤兒扶柩歸程遠啼殺林間返哺烏

挽故豫章義士吳復原

挺生英傑百夫防高義孤忠少頡頏
艱食屢分圖共濟危城百戰誓同亾
延津劍去秋無氣合浦珠還夜有光

三復園亭新墓表哀榮寧獨在瀧岡

挽吳公祐祭酒母劉夫人二首

淑容玉潤氣冰清擇對仍歸間世英
四德遠從麟趾化九苞親見鳳毛成
正當愛日調珍鼎遽爾乘雲上玉京
回首仙蹤無覓處雙峯雨露倍傷情

母儀婦道重當今共說夫人獨苦心
教子遂成雙白璧救夫不惜萬黃金
家庭遺愛留名郡父嘗為興國監郡阡表新
銘出翰林每遇良辰增孝感板輿閑卻在花陰

題吳公祐祭酒雙峯雨露亭

春到先塋雨露饒思亭新構報劬勞
碧涵一水吞天闊

玉立雙峯拔地高每想音容增怵惕還因精氣感薰蒿
通家二世深恩在把筆題詩淚滿袍

挽謝伯昇母王安人

蘭蕙爲心玉作姿闈門彝範後人師齊眉致敬過賓禮
和膽資勤冠母儀歲晚靈椿聯奕葉春深文梓長孫枝
正當琴瑟偕娛老豈意栝棬感孝思

武餘清樂爲致仕尹將軍賦

汗馬功成卽引年登山臨水小遊仙印紋久祕微生綠
字韻新成盡入玄深造烟霞靈運屐浩歌風月鄂君船
貽謀尙有孫吳略膝下時時課一篇

紫閣山房爲史仲魚賦

太華諸峯紫閣奇結茅應不負幽期遠分空翠來函谷
靜寫脩蛾入漢陂紅日屋頭臨照近白雲窗外卷舒遲
曳裾自到金門下猿鶴無時惱夢思

送長史管公時敏朝京

黃鶴樓前畫舫開送車千輛動浮埃楚人獨數蘇從諫
齊士誰過管仲才報政每隨鷓鴣入覽輝重見鳳凰來
君心東注同江漢一一敷陳對玉臺

次向自誠韻

自誠爲子築行窩于所居以詩見意次韻奉謝

道究先天太乙初金門大德復誰如已承丹篆三天籙

還讀青藜午夜書華表忽歸遼海鶴仙庖頻食武昌魚
行窩處處春風裏擬辦堯夫浴下車

春暉堂

江夏雷道夫奉
母呂夫人之所

羣勇盡待青陽發萱草先侵白雪還蔚矣芳心承麗景
宛然愉色奉慈顏陳王葵藿君臣際謝傅芝蘭伯仲間
忠養無違家慶遠韶光常映舞衣斑

歲寒書屋

四明俞用吉御史
早年藏修之所

學究天人獨下帷歲寒元自有深期若非文史三冬足
安得功名百世垂臺閣生風當此日軒牕映雪已多時
由來不負澄清志冰蘖聲名草木知

謝劉伯昇愈疾

伯昇起子沈病合
府諸彦為詩稱謝

故人素擅岐黃術今我兼承管鮑知高義百年存古道
沈疴一旦起神醫杏林春早繁花合橘井秋深美實垂
最愛相酬無長物數篇清絕盛唐詩

常秀軒為姻姪唐仲節賦

脩竹疎松一徑存故家德澤久培根歲寒並勵冰霜節
春永均霑雨露恩翠蓋垂珠知結子錦綉抽玉見生孫
要知奕葉承家慶多在詩書禮義門

送詹光夫之雲南通海校官

儒冠跋涉敢辭勞直以詩書化不毛盛世用文興禮樂

鬢宮接武貢英髦密依壇杏登絃誦獨對山茶設醴醪
會見毓才功第一歸來宮錦賜新袍

得亾友郭至善醫士哀問二首

不知大夢赴華胥猶向來人問起居藥圃春深餘故植
芸窻日永列遺書獨憐宿草迷荒塚安得生芻致倚廬
咫尺無由親執紼深慚千里巨卿車

俊骨英才孰與儔華星明月照清秋重傷賈誼才無敵
深慟顏淵德最優過墓自當留寶劔濟河誰復共仙舟
極知脩短俱天命老淚無端似水流

寄鉉宗鼎

時在定水蒲庵間居定水寺
號雙峯在海濱地名鶴臯

開士幽棲何處是一庵瀟灑傍雙峯彈琴夜和鳴臯鶴
咒鉢朝降渡海龍萬里思鄉瞻北斗十年學道事西宗
故人海內皆星散憶爾山中冰雪容

夜宿染上人溪舍

雲去禪關戶牖空清溪碧樹有無中倒涵天影魚吞月
逆戰秋聲犬吠風見性本圖先作佛勞形翻愧早成翁
杜陵老去歸無計來往那辭惱贊公

昏瞶一首

錄呈靈淵老
師求印方

老來昏瞶底須嗟聲色雙忘也自嘉秋枕不驚風外葉
春杯長對霧中花海師唱道禪多悟張籍題詩字半斜

幸有靈臺長不昧日觀耳聽總無差

獨松庵

獨撫長松書掩扉歲寒高節想無違
芙蓉春暖供齋鉢
羅薛秋涼製道衣原本缺三字
川龍起蟄月明滄海鶴來歸
淨瓶滿貯菩提水恐有人叅第一機

題建昌王子中橋亭八景

橋亭風景洞天如中有儒仙舊隱廬
春漲撥藍涵帶練
灑波春漲內曉嵐滴翠濕芙蓉龍深窺嵐內有石梁長橋
受詩華巘
浮玉館中華翠巘峯頭有浮玉仙字
說劍香爐許令居香爐紫烟峯頭有許旌陽居雲外懸崖飛屐上懸崖
雨中沃壤帶經鋤田東暮雨
疎鐘

鯨吼霜華里聖容僧鍾長笛龍吟月色虛雲原仙笛老我塵寰懷

勝景追遊早晚命中車

送進士都堅不花出宰三山

龍沙公子龍頭客錦繡胸襟玉雪顏
一日葦英驚四海
九天承寵宰三山花前封印青春醉
槐下鳴琴白晝閑
守令近民勤聖念早須報政五雲間

觀太守兄昌國勸農

東臯風日媚新晴太守躬畊曉出城
裊裊雙旌穿柳過
蕭蕭五馬踏花行扶藜父老陪諮訪
騎竹兒童主送迎
豈意兵荒南北遍化行滄海獨昇平

頌歷
腐儒避地海東偏鳳歷頌春下九天載拜帝堯新正朔
永懷神禹舊山川廟堂久託君臣契藩閫兼操將相權
只在忠良勤翊戴萬方行覩至元年

勉戴玄學

才名籍甚冠時髦愛爾青年氣獨豪千里共誇騏驥足
九苞爭覩鳳凰毛月中把桂雲生履天上看花日映袍
宦達每由稽古力夜窻燈火莫辭勞

贈陳章甫

少年仗劍遊京國豪氣崢嶸歷五陵柳綠御溝春飲馬

草黃上苑曉呼鷹日邊冠蓋人人識雪後舟航處處乘
白首歸來尋舊隱高談驚座羨君能

寄西湖林一貞先生

錦繡湖山世絕稀東風不放賞心違芙蓉楊柳臨清淺
佛刹僊宮繞翠微畫舫載春天上坐紫驢馱醉月中歸
高情獨有林和靖門掩晴空看鶴飛

送潘允章歸天台定省

從師久客鄞江館重憶庭闈問起居五彩早成萊子服
一經今授伏生書落花芳草春停騎斜日孤雲暮倚閭
暫爾南歸仍北上萬言敷對玉階除

次張撫軍韻二首

先公昔鎮西南日幾拜殊恩出御筵桃李門牆賓客盛
芝蘭庭砌子孫賢百年遺愛齊民服一代鴻勳信史編
最是撫軍能接武挑燈夜讀十三篇

堂堂雄略靖三邊
豐壘清談動四筵
夜月轅門嚴士卒
春風幕府集才賢
詩宗李杜元無敵
書法孫吳每自編
白首栖栖江海客
遠煩馳寄錦雲篇

寄張廷言

千里關河阻重兵
兩煩書札見深情
故人我久知張祿
處士時多忌禰衡
閱世正當思豹變
出關何必待雞鳴

莫嗟才大難爲用
天運行將返治平

送人歸故園

故園休道已休兵
客裏那堪送客行
老去別懷殊作惡
亂餘歸計倍關情
孤村月落羣雞叫
絕塞天清一鴈橫
到日所親如見問
浪遊江海負平生

次東軒居士韻

珠玉新詩照士林
長城寧畏短兵侵
春雲有態時時變
秋水無痕岸岸深
洛下才名推獨步
越中山水喜重臨
別來歲晚偏相憶
誰折梅花慰渴心
丙午十一月二十四日夜夢回書事

抱病經時不出門存亾一一念諸昆兵戈隨處斷消息
風雨終宵勞夢魂竹下題詩雲起硯花前度曲月當樽
每因舊事增新感獨對寒燈拭淚痕

寄胡敬文縣尹

胡遂初真人海上漕舟比還得應
奉兄書云湖廣親兵後僅二公寄

詩以

湖北衣冠藹士林十年兵革盡消沈崑岡火後餘雙壁
錦里書回抵萬金鳧鳥趨朝天闕近霓裳度曲月宮深
誰知海上垂綸者去國長懸萬里心

奉寄表兄白留守兼呈楊廉使

白髮先朝舊從臣懸車徧看五湖春養恬高節矜持重

優老濃恩奉拜頻每有緇黃談幻化可無朱紫問經綸
座中不遇楊開府肯把平生對客陳

海巢

海上巢居海若降三山眼底小如瓦已攀若木爲華表
更立樽桑作翠幢蛟室夜光晴燭戶蜃樓秋影冷涵窻
鷓鴣夢斷無因到唯有同棲鶴一雙

太守兄遣紙帳仍贈以詩次韻奉謝

湘娥翦水霜刀勻虛室生白無纖氛壺中但覺風雨隔
殼裏豈知天地分蟾光夜明楮葉露蝶夢春遶梨花雲
恍然置我銀世界縱有瓊瑤難報君

渡鄞江後寄陸時敏陳可立

小艇橫江捷似飛故人凝睇送將歸
過山殘照明紗帽渡水浮雲亂葦衣
沙鳥水鷗同泛泛岸花汀草各依依
風塵來往慚經濟擬著漁蓑坐釣磯

寄張左瞽

張生脫略今有年食無梁肉眠無氈
丈夫既與世不偶負賤肯為人所憐
齊眉已喜孟光敬翦髮况聞陶母賢
佛衣歸來好共隱與爾並耕沮溺田

別四明親友

烏季善余伯雅諸公攜詩戴酒
祖道鄞江之上賦此以謝之

春雨晴時春水生春風搖蕩別離情
柳條弄色已堪把

鶯語怯寒猶未明白雪翻聲歸錦軸
紫霞流影入瑤觥當江打鼓放船去
長揖同袍好弟兄

遷葬後還四明途中寄武昌親友

浪遊吳越任荆湘來往那辭道路長
篋內有書慙歷國邸中無綬敢誇鄉
潮生別浦江雲白塵起征途野日黃
若問離人行役苦十宵九夢在瀧岡

九日登定海虎蹲山

東海十年多契濶西風九日獨登臨
天高雲靜鴈初度水碧沙明龍自吟
籬下菊花憐我瘦盃中竹葉為誰深
凭高眺遠無窮恨志國懷鄉一寸心

腐儒

落魄乾坤一腐儒生逢四海日艱虞異邦作客歌黃鳥
空谷懷人詠白駒豈有縱橫干七國亦無詞賦擬三都
時危那敢辭貧賤第恨長年走畏途

避地

避地長年大海東蕭條生事野人同深春耒耜孤村雨
落日帆檣遠浦風那得文章借隱豹聊將音問託歸鴻
平生自恨無仙骨五色蓬萊咫尺中

異鄉清明

十年瀕洞家何在萬里清明客未歸雨慙風倦花亂落

泥融水暖燕交飛烟生榆柳推遷速雲鎖松楸拜掃違
旅鴈盡回音問斷側身長望淚頻揮

卜居二首

木石為交不背盟卜居應得愜幽情雨苔蘸水溪魚上
風葉墮堦山犬鳴習懶已成忘盥櫛避喧漸遠絕逢迎
義肥百戰收全勝特為耽詩太瘦生
小村雖僻俗敦龐背負崇山面俯江月冷靈虬潛絕壑
雨晴仙犬吠流淙緼袍御臘繡袷瓦甕浮春謝玉缸
偶為清羸聊採藥亦非竊比鹿門龐

寄昌國濟汝舟長老

先兄太守嘗題詩于方丈

西江禪伯住東溟境接蓬萊地最靈析木秋濤浮座白
扶桑朝影拂簷青已無鶴近雲間錫祇有龍聽月下經
李白騎鯨天上去題詩誰復叩岩扃

寓奉化寺寄菩提寺主

菩提嶺外空王寺丹磴行穿虎豹羣萬壑濤聲岩下瀑
千峯雨氣屋頭雲海龍送水金瓶貯天女懷香寶鼎焚
慚愧無緣塵土客朝朝鐘鼓下方聞

奉寄恕中韞禪師

曾向名山識異人心如木石氣如春坐禪霜葉秋埋膝
行道天花日繞身有鉢相傳元是幻無錐可著本非貧

惟餘潭底中秋月對寫龍峯面目真

時留龍峯傳燈

寄龍門海禪師

子自海東初回龍門嘗招子入社故有還家鶴之喻也

曾向龍門俯急流泰山如垤海如漚學仙漫比還家鶴
作佛須看露地牛遠岫孤雲歸薄暮澄潭一月印清秋
葛川舊有三生約擬策枯藤到上頭

寄東湖濬天淵長老伯仲

平湖一鑑涵空明千鬟照影羣峰晴慈雲或將花雨過
幽泉盡學松濤鳴清溪對戶忽長嘯老鶴下階時獨行
何人最得此中趣無著天親好弟兄

送錚聲外侍者還定水寺

侍者乃見心長老入室高弟

侍者還山脩白業何須門外問三車微塵有相皆成幻

大道無歧直到家月滿秋岩收桂子雪消春澗采蒲芽

阿師弘教人獅子佇見傳衣後代誇寺有天香室蒲菴故云

送信立菴長老住靈巖寺寺即吳王避暑宮也山中古跡有香逕硯池涵

空閣

上人駐錫靈巖寺正是諸天聽法時日下幡幢朝旋旋

雲間鐘鼓晝遲遲殘紅掩冉迷香逕空翠溟濛落硯池

不盡平生懷古意涵空閣上一題詩

題東湖青山寺古鼎銘長老鍾秀閣

手開樓閣貯羣經面對湖山衛百靈玉鏡夜寒通沆瀣

翠屏秋淨倒空青避烟鶴起簷間樹行雨龍歸几上瓶

我亦逃禪雲水客便應蕭散共松扃

題二靈山房在東湖為濬天淵長老作

寶刹憑虛戶牖開羣峰北走水南迴六鼇夜涌金銀闕

九鳳朝翔紫翠堆日靜雲間飛錫下月明天上渡杯來

談玄每就岩房宿最愛三車有辨才

題澹然齋為慈溪澗上人賦

寂寂禪扃掩畫陰阿師道味此中深一塵不涉冰霜操

萬境俱空水月心駐屐寒香生小徑捲簾秋色上疎林

莫愁客至無清供玄酒盈樽好共斟

題悠然軒

為慈溪牧上人賦

香消靜室定回時真趣忘言祇自知
雲淡風輕天蕩蕩
鳶飛魚躍晝遲遲傳來西竺元無法
坐對南山或有詩
不是淵明來入社百年誰與共襟期

清勝軒

為姑蘇潤上人作

繞屋松杉手自栽重陰長日護蒼苔
一溪窈窕花間入
三徑參差竹下開夜半霜鐘寧假筵
秋深月鏡本無臺
主人定起焚香坐何處扁舟棹雪來

些子景

為平江韻上人作

尺樹盆池曲檻前老禪清興擬林泉
氣吞渤海波盈掬

勢壓崆峒石一拳彷彿烟霞生隙地
分明日月在壺天
旁人莫訝胸襟隘毫髮從來立大千

半村

為姑蘇信立菴禪師作

菴居背郭稱疎慵道韻清孤野趣濃
花徑縈回通小市
竹窻窈窕納遙峰五更風遞巖城角
半夜霜清古寺鐘
昨日鄰翁告東作四郊春雨起降龍

雲石

為貞長老作

坐石看雲絕百非空山終歲澹相依
臥龍春煖潛噓氣
伏虎年深不振威已向諸天陳瑞彩
更從歷劫拂銖衣
驀然觸著無拘礙蕩蕩乾坤自在飛

白石為琦公宗師作
雪色雲根出翠微，堅貞不與道心違。塵空自比神仙鏡，路滑誰參佛祖機。豈為礪金希世用，都緣韞玉發山輝。點頭默契生公法，絕勝商歌歎短衣。

寓東湖二靈寺

二靈古稱山水窟，興來獨往亦一奇。扣舷時聞小海唱，奪卷復觀長江詩。月中聽鶴坐不寐，烟外盟鷗歸每遲。桃花流水儻得路，便應黃髮為漁師。

次義上人韻

冥棲九隴傍雲松，茗盃熏爐取次供。月滿長空秋放鶴，

雨昏大海晝降龍。病中普施諸方食，定裏長聞上界鐘。明哲古來多玩世，不妨隨處舞三筇。

再用前韻贈祖庭興上人

匡廬攬秀昔巢松，水色山光左右供。日下奇峰金作鳳，雲間飛瀑玉為龍。撲簾空翠霑晴几，拍枕寒濤隱暮鐘。從此胷中富丘壑，乾坤萬里一吟筇。

悼湖心寺壁東文上人

祇林一葉隕秋霜，回首滄洲淚兩行。几上殘經塵已暗，篋中遺藁墨猶香。雲迷圓澤三生石，月冷維摩十笏房。想像清容何處記，寒梅的的竹蒼蒼。

山居詩三首呈諸道侶

一榻東軒迥絕緣，寒巖枯木共忘年。雖非悟道龐居士，豈是耽詩賈閬仙。禪定儘教崖石坐，法音都付澗湍傳。晴牕終日無他伎，只辦飢食與困眠。日日看山眼倍明，更無一事可關情。掃開積雪巖前坐，領取閑雲隴上行。不共羽人談太易，懶從衲子話無生。劃然時發蘇門嘯，遙答風聲及水聲。懶散形骸不自持，黃冠聊束鬢邊絲。頻來猿鶴渾相識，久混龍蛇竟不知。養拙最宜情澹泊，全生深藉德支離。看雲本自忘飢渴，況有冰泉與石芝。

逃禪室解嘲

久慕陶公臥北窗，還從馬祖吸西江。掃愁那用千金帚，折屣惟瞻七寶幢。日晏捲簾延疊嶂，雨晴欹枕聽流淙。周妻何肉俱無累，祇有詩魔老未降。

寄鄭高士

閉門疑坐學長生，七返還丹一息成。野服春深裁白苧，山庖日午薦黃精。烟中鹿引朝真駕，月下鸞隨度曲笙。卻笑秦人太癡絕，樓船萬里訪蓬瀛。方瞳廣頰古先生，氣秉先天獨混成。辟穀齋房食石髓，採苓幽澗役山精。星辰夜動龍纏劍，風露秋清鶴載笙。

別後仙蹤杳難覓相思幾度夢登瀛

寄武昌南山白雲老人

姓衛字均執先人時故舊家居未嘗入城市聞鶴年

辛苦遠還遣子弟問遺不絕鶴年足疾日劇弗克往拜牀下謹奉拙詩少致謝

故人家住南山下
心與白雲共瀟灑
酒芝草遙賡黃綺歌
蓮花近入宗雷社
嗟予江海避風塵
白首歸來失所親
壽眼相看如昔日
只有南山與故人

自詠十律

省蘭曰十詩沈鬱頓挫慷慨蒼涼即未追蹤老杜亦足接武遺山

長淮橫潰禍非輕
坐見中流砥柱傾
太守九江先效死
諸公四海尙偷生
風雲意氣慚豪傑
雨露恩榮負聖明
一望神州一搔首
天南天北若爲情

腐儒避地海東偏
鳳歷頒春下九天
再拜帝堯新正朔
永懷神禹舊山川
廟堂久託君臣契
藩閫兼操將相權
只在忠良勤劬戴
萬方行覩至元年

一夜西風到海濱
樓船東出海揚塵
坐慚黃歇三千客
死慕田橫五百人
紀歲自應書甲子
朝元誰共守庚申
悲歌撫罷龍泉劍
獨立蒼冥望北辰

羲軒道德久荒唐
蕩蕩宏圖起世皇
天入清都逾廣大
日臨化國倍舒長
渥洼萬里來騏驎
阿閣千年下鳳凰
聖子神孫承寶祚
長令億兆樂時康

堂堂至正最多材
萬國同文壽域開
漠北諸生登第去

越南計吏進賢來鳳韶九奏黃金殿鶴駕三朝白玉臺
回首黃塵揚碧海五雲無處覓蓬萊

金銀宮闕五雲鄉曾見羣仙奉玉皇濟濟夔龍興禮樂
桓桓方虎靖封疆自淪碣石滄溟底誰索玄珠赤水傍
獨有遺民負悲憤草間忍死待宣光

千官何處扈宸遊回首風塵徧九州黃竹雪深迷玉輦
蒼梧雲斷見珠丘令威不盡去家怨精衛豈勝填海愁
大禹胼胝天所眷肯教綸邑久淹留

六軍遙駐黑河濱故國正墟詎忍聞露冷金銅應獨泣
火炎玉石竟俱焚虞淵日暮無還景禹穴秋深有斷雲

草澤遺民今白髮憑高無奈思紛紛

皇天輔德本無親興復寧論地與民綸有一成終祀夏
楚雖三戶竟亾秦昆蟲咸被生成德草木猶懷化育仁
洪運未移神器在周宣漢武果何人

九鼎神州竟陸沈偷生江海復山林頻煩誰在隆中顧
憔悴唯餘澤畔吟嚙雪心危天日遠看雲淚盡歲時深
一年家國無窮事可得忘機老漢陰

回首黃塵揚劫海五雲無處覓蓬萊
金銀宮闕五雲鄉曾見羣仙奉玉皇
相和方曉時時語論語林林若野鹿
獨有遺風得似仙清宮欲待甘霖
并披軻使運漢漢仙宮且應歸出
瀟湘湘水瀟湘水瀟湘水瀟湘水
欽賜玉皇外孫吳越越越越越越
皇天離離本無離離離離離離離
賦賦賦凡合由邊邊邊邊邊邊邊

藝海珠塵

南雁 吳 省蘭 泉之輯
仁和 許 乃濟 作舟校

丁孝子詩集

丁鶴年篋

卷三 七言排律 七言絕句 銘 附錄 傳

詠雪三十韻

省蘭曰如此隨手填詞
雜亂無章不可為訓

露闕雙開太素天通明殿裏宴羣仙
娉婷後隊瓊花簇 瀟灑前班玉笋聯
步月霓裳輕冉冉御風鶴筆捷翩翩
大珠玗璠遺懸佩碎璧玲瓏委墮鈿
掩日韜霞呈絕巧

鏤冰翦水鬪清妍瑤池桃熟迎王滿銀漢槎回送使轡
上界乘時誇富貴下方何路告顛連自從宇宙縱橫亂
頓使閭閻苦樂偏出塞共愁貂帽重趨朝爭美鶴袍鮮
未春上苑先飛絮不夜邊城正折綿陰窖孤忠蘇武節
空齋獨冷廣文氈羊羔已屬將軍飲鳳髓還歸學士煎
儒臥洛陽晨閉戶清狂刻曲夜回船軟裘快馬增朝陌
破屋孤鐙壓暝烟狂走平原丞相犬飢鳴廢壘伏波鳶
梁園作賦頻呵筆灞岸尋詩懶著鞭入地豈應蝗滅蹟
聚沙那辨鷺聯拳謫潮木免銜冤去破蔡終期奏凱還
糞壤眼前蒙暫底穿坑腳底已虛填盡驅瘴癘南侵越

直逞陰威北犯燕就暖羽毛違絕漠避寒鱗甲蟄深淵
樓臺遠近皆粧飾陵谷高低悉變遷已詐清宵爲白晝
還誣歉歲作豐年穢灘漁艇愁膠輿失道征鞍畏沒羈
隱匿瑕玼稱淨域朦朧礪礪號平田聲隨折竹驚欹枕
影逐殘梅亂舞筵助虐驟添風凜烈惡明深妬月嬋娟
蟹行莎盡寧知止蠶食桑空未肯眠欺老虐貧俱實効
呈祥表瑞總訛傳何當紅日升暘谷盡化流澌赴百川
上明州太守茶子俊還武昌遷葬告牋而作

漢江東抱楚山流先壠猶餘土一抔廟冷桐鄉耆舊逝
田荒粟里子孫愁兵戈隔夢三千里霜露傷心二十秋

荒墜天寒烏鳥下空林日落白狐遊碑焚斷石經時變
盃出遺金有夜偷過客尙知來下馬仙翁誰復指眠牛
擬從樊口遷京口遙別沙頭下石頭高士束芻思致奠
故人惠麥久維舟已知多病垂垂老敢爲長貧故故留
爲政幸逢宗正恕申情當念子平憂劬勞罔報生何益
存歿沾恩死必酬願及清明三月節一盂麥飯酒松楸

投贈鍾經歷

告牋還武昌省墓

潁川家世少游車大府從容贊畫餘泛水依蓮饒勝賞
飲冰啖蕪富清譽高談賓幕風生席退食公庭月照閭
最愛小胥勤吏牘更逢太守重詩書登樓望海吟懷遠

拄笏看山雅度舒藥籠參苓隨選擇花磯桃李藉吹噓
殊方有客飄零久先壠無人拜掃踈化筆久推公道在
况曾同食武昌魚

上武昌太守傅藻

守墓間陳情

蕭蕭五馬駕雙旌太守承恩下玉京氣槩浮雲蒸華嶽
胸襟弱水浸蓬瀛擁經東出辭儲館分竹西來鎮鄂城
地轉陽春蘇赤子天回霖雨濟蒼生掃除積弊文書簡
慰藉羣情賦斂輕每以哀矜存豈弟還從擿發見神明
笑談頓息清河訟指顧潛消渤海兵已喜箕裘傳傳說
行看車馬賜桓榮閣有學皆興起猷猷無田不播畊

懸榻每因高士下清樽多爲上賓傾過山問俗雲生屐
出郭勸農雨濕纓月滿南樓揮塵坐花明北榭引車行
題詩每擬招崔顥作賦何曾厭禰衡感化屢聞虓虎渡
忘機不使狎鷗驚滿門桃李新陰暖遍野桑麻曉色晴
汗簡定應書善政口碑先已播賢聲肯憐倦客垂青盼
特爲明公寫素誠作縣前人書上考登科後裔廟羣英
亂離一去榮華盡契闊重來坎塲嬰豈爲尊羹思故里
敬將麥飯洒先塋陶潛柳盡家何在潘岳花殘邑屢更
鶴髮遺民供祀事龜趺斷碣載題名獨歸華表丁寧語
誰顧鹽車俛仰鳴往事易成蕉鹿夢舊遊難覓黍雞鹽

履殘需露心逾苦目斷停雲淚更橫已幸玄堂新改厝
猶慚丙舍未經營名隨版籍遙編越身戀松楸重去荆
存沒離魂同慘慘往還孤影復瑩瑩敢方王粲依劉表
竊冀興宗念子平爲政古來先孝弟願伸人子未伸情

過安慶追悼余文貞公

將軍疋馬入舒城擊賊頻煩訓義兵孝以保家忠殉國
聚而出戰散歸耕園侔月暈全無隙捷振天威大有聲
游說飛書徒聞謀輸誠伏節愈堅貞雲梯屢卻妖氛豁
露布交馳殺氣平千里荆揚憑保障七年淮海賴澄清
山深窵獮穢還出江濶鯨鯢斬更橫外援內儲俱斷絕

裏瘡飲血獨支撐天昏苦霧埋營壘日落陰風卷旆旌
甘與張巡爲癘鬼肯同王衍悞蒼生三千將士皆從死
百二山河亦繼傾靜對風靈思號令遙從箕尾識精誠
頌碑不愧詞臣色哀詔偏傷聖主情願爲執鞭生不遂
臨風三酹重沾纓

讀應奉兄登科記愴然傷懷因成八韻

射策彤廷被寵榮遺經三復若爲情重傷趙璧經時毀
翻恨隨珠徹夜明洪範有書傳太乙佳城無郭葬長庚
青雲路斷甘淪沒碧海塵飛苦變更自信爲臣當委質
誰能向賊更求生家貧寡弱遺妻子道遠存亡隔弟兄

一旦音容成永訣十年涕淚鎮交橫茫茫原隰無求處
獨立長風送鴈聲

七言絕句

敬書宸翰後

神龍歸臥北溟波愁絕陰山勅勒歌惟有遺珠光奪日
萬年留得照山河

題蕭郎天馬圖

春明立仗氣如山顧盼俄空十二閑一去瑤池消息斷
西風吹影落人間

題桃源圖

放舟長怪武陵人強覓桃花洞裏春若使仙源通一線
如何避得虎狼秦

暮春二首

楊花榆莢攬晴空上界春歸下界同蜂蝶紛紛竟何在
獨留杜宇怨殘紅

一夕春歸徧九垓千紅萬紫盡塵埃韶光淑氣逡巡退
暑雨炎風爛漫來

題畫

江樹青紅江草黃好山不斷楚天長雲中樓觀無人住
只有秋聲送夕陽

題萬歲山玩月圖

金銀樓觀鬱嵯峨琪樹風涼秋漸多徙倚危欄倍惆悵
月中猶見舊山河

題畫葡萄

故人毛楚哲作

西域葡萄事已非故人揮洒出天機碧雲涼冷驪龍睡
撿得遺珠月下歸

榮枯

春意方酣紅杏盡秋聲又戰碧梧枝野人不識春官歷
坐閱榮枯紀歲時

牡丹

藝海珠塵

名花傾國不凡材，池館春深尚未開。
風雨一宵桃李盡，異香清曉九天來。

梧桐

井梧徹夜下霜風，錦繡園林瞬息空。
老盡秋容何足惜，鳳巢吹墮月明中。

聞簫

給喪未必無周勃，乞食誰能辨伍員。
昨日英雄今日恨，洞簫忍向亂中聞。

聞鴈

月落江城轉四更，旅魂和夢到灤京。
醒來獨背寒燈坐，

風送長空鴈幾聲

題鄭氏義門

每病漢民歌布粟，忍聞秦俗德穰鋤。
鄭家九葉猶同爨，風化知今古不如。

題梅花扇面寄五十僉憲

憶向西湖踏早春，萬花如玉月如銀。
一枝照影臨清淺，滿面冰霜似故人。

題族兄馬子英進士梅花

池館春深看牡丹，五陵車馬隘長安。
誰知凜凜冰霜際，卻是梅花守歲寒。

題前人竹石嘉樹圖

翠實可充丹鳳食喬枝仍待早鶯遷一拳蒼蘚荒秋雨
惆悵無人解補天

題表兄賽景初院中新竹

景初故咸陽王賽英赤之孫也

雙玉亭亭出粉牆便添風月入吟觴會看直上三千尺
截簡先書異姓王

贈表兄賽景初

蕭條門巷舊王孫旋寫黃庭換綠樽富貴倘來還自去
只留清氣在乾坤

雨窗宴坐與表兄論作詩寫字之法各一首

南窓薄暮雨如絲茗盃熏爐共論詩天趣悠悠人意表
忘言相對坐多時

蠅頭小楷寫烏絲字字鍾王盡可師忽悟庖犧初畫象
工夫元不在臨池

題顧仲贄先生南山遺藁後

玄豹無心守九關日隨霧雨隱南山莫嗟遺翰同羊犬
猶託文章見一斑

題林泉野趣圖

清江白石帶疎林樊口幽居尚可尋夢裏草堂無恙在
秋風春雨總關心

題猫

食有溪魚臥有裊有恩深重更無倫若將乳鼠誇為瑞
恐負隆冬蜡祭人

題鷹

脩翎快劔爪剛鉤自獵平生恥下韝擊盡秋原鴟與鏡
卻從靈囿鳳麟遊

題鴈

兵戈故國日凋殘野蔓荒烟白骨寒日送飛鴻度關塞
有書無處報平安

題鷺

當年百轉上林苑身愈高時韻愈奇兵火十年喬木盡
託棲那敢怨枝卑

元旦與天淵長老雪後泛溪
不將栢葉園爐飲卻為梅花放棹看詩在霸橋驢子上
阿師空忍雪山寒

迎大年椿上人不值暮歸偶成
東歸聞道已浮杯力疾遙迎日幾迴何處晚來成誤認
風簾竹影月窻梅

題椿上人梅花

娟娟淨色雪消餘翦翦寒香月上初標格若教諸佛見

首將蒼髯譬真如

寄龍門禪師二首師自號補衲

上方樓閣闕烟霞
補衲重來歲月賒
拄杖入門如隔世
依然翠竹對黃花
靈山積雪赤城霞
咫尺東西路不賒
破碎衲衣剛補就
不煩天女散天花

題天師竹

琅玕仙節鬱蕭森
知受三天雨露深
投老相求訪真訣
獨騎龍杖度千岑

題畫

水榭山牕面面同
穀紋波起鯉魚風
溪頭艇子林間泛
來往能無避俗翁

題會稽王冕翁畫梅

永和筆陣在山陰
家法惟君悟最深
寓得梅花兼二妙
右軍風致廣平心

紅梅

姑射仙人煉玉砂
丹光晴貫洞中霞
無端半夜東風起
吹作江南第一花

紅梅翠竹

瓊仙服盡紫金丹
不識人間有歲寒
一笑荒村春似海

載歌淇澳報平安

水仙花二首

湘雲冉冉月依依翠袖霓裳作隊歸
惟底香風吹不斷
水晶宮裏宴江妃
影娥池上晚涼多羅襪生塵水不波
一夜碧雲凝作夢
醒來無柰月明何

竹枝詞二首

竹雞啼處一聲聲
山雨來時郎欲行
蜀天恰似離人眼
十日都無一日晴

水上摘蓮青的的
泥中採藕白纖纖
卻笑同根不同味

蓮心清苦藕芽甜

題定海樂節婦劉氏沿江泣尋夫屍卷

怨入江雲結畫陰
潮痕清淺淚痕深
白頭重見黃泉下
方盡寒燈一寸心

題松江梧桐鄉鳴鳳里朱節婦卷

手植梧桐不憚勞
朝陽鳴鳳一來遼
託棲未穩翻然逝
慰眼惟遺五色毛

重到戴玄學齋居

憶坐詩壇棹酒船
花枝旖旎月嬋娟
一從鳧舄朝天去
月夕花朝兩惘然

題竹間翁白馬圖

誰識驍騮汗血中靜團晴雪動生風一從選入天閑內
不覺人間萬馬空

題唐申王三駿圖

三駿英英出渥洼太平芻粟飽天家誰知百戰平河北
汗血功歸獅子花

戲題明皇照夜白圖

天上麒麟天下稀月中幾送八姨歸君王寓目應追悔
悞看乘鸞度羽衣

題劉伯昇所藏蘭亭

右軍高致極清真盛集蘭亭詠暮春文彩風流那復見
摩挲遺墨想丰神

蘭蕙軒為滁陽張景暘景昭兄弟所作

八龍夭矯同瑤席三鳳聯翩上玉堂爭似高軒蘭與蕙
光風遠近遞清香

武昌南湖度夏

湖山新雨洗炎埃萬朵清蓮鏡裏開日暮菱歌動南浦
女郎雙漿盪舟來

紅蓮白藕詩二首

紅蓮白藕兩相宜欲採臨流意轉遲蓮子縱甜心獨苦

藕芽雖美腹多絲

採蓮採藕湖水潯阿儂踏歌郎賞音多虛少實如郎意
外甜內苦似儂心

送蔡用嚴還四明二首

四明故舊苦無多死別生離奈若何老淚暗添江漢水
隨人去作海東波

迢遙海國接江鄉一度懷人一斷腸正值西風搖落際
可堪重送蔡中郎

寄四明諸友

海上歸期苦恨遲歸心日與海爭馳故人有待吾衰矣

一寸寒灰萬縷絲

寄武昌巖靜山賢友

出門便有好湖山對酒當歌莫暫閑不請自來留卻去
無情白髮與朱顏

次舒庵見訪韻

退食從容馬首東夕陽斜映柳營紅掃門將帥遙相待
卻訝寒齋訪禿翁

哭四明宋廷臣推官

甬東郭外為鄰住湖北城中值宦遊直擬千回同一日
那知一別竟千秋

題水竹居卷

夜夢青鸞浴鳳池曉來水竹索題詩浣花吏隱無人繼
老我風塵寫愧辭

寄武昌張尚本

綠鬢朱顏素節新歲寒風雪苦相侵明堂清廟登庸日
佇聽簫韶奏治音

銘

行素軒銘

三衢張君師震清才懿行有守有為久滯下僚不以崇
卑為欣戚名其軒曰行素西域鶴年喜為之銘曰

素履所踐正道平平流行坎止一聽于天夏禹之憂顏
淵之樂易地皆然道同天爵忠信篤敬蠻貊行焉戒心
微服孔孟猶然彼美吉士力行其素屈伸利鈍隨其所
遇廊廟匪崇關鐸匪卑居易君子視此銘詩

復淵銘

武當高士郭復淵氏讀書學道研覃性命之懿西域鶴
年為作復淵銘以勉之銘曰
沈沈止水如大圓鏡一波不生萬象交映彼美外史知
止有定觀水之淵復我之性湛然虛明猶水之瑩寂然
不動猶水之靜眾理具存四端隨應操之者仙念之者

聖至道不煩主一持敬

竹隱圖銘

江夏奚翁隱居種竹其卒也二子伯瑄仲瑛俱以學行顯于時作竹隱圖寓其孝思以予與翁有素交之好請題其上敬製四十八字以識久要之誼云

昔有君子隱居種竹截簡著書垂竿釣玉委順暮年孰繼芳躅二子秀發鬱若蒼筤文章雲錦節操冰霜圖諸座右庶幾羹牆

菊泉軒銘

鄂渚甘翁引泉種菊以存晚節匡山吳先生題其軒曰

菊泉西域鶴年乃為之銘銘曰

英英徑菊混混原泉凌霜悅茂挾雨潺湲以香以潔併作清妍中有靜者于焉周旋采之服之愈疾引年濯之嗽之內澄外鮮德日以新壽日以延深存晚節慨慕先賢和歸來辭談秋水篇

養素齋銘

廣西叅議董元芳之謫戍辰陽也扁其所寓曰養素日以詩書自娛請銘于予視其所存有非世俗所能者是可無愧於銘齋矣

願乎外無入不得以直無害勗哉董子不舍三餘仕學
兩優得失一如達不離道窮當益堅終始勿渝子其勉
旃
附錄
鶴年兄名吉雅謨丁字元德至正間進士任浙東僉
都元帥
寄邁里古思院判
將軍辛苦事戎行麾下論兵總俊良沙漠蘇卿多感慨
鑑湖賀老自清狂風塵滿眼青山舊天地無私白髮長
萬里君親俱在念扁舟何日賦滄浪

遊定水寺寄杜堯臣

水紋藤簟竹方牀山閣重陰雨後涼新月梧桐秋已老
孤燈機杼夜初長白魚入饌松醪熟紅稻供炊笋脯香
雲樹芝泉隨處好一時清賞肯相忘

題浙東廉訪知事楊仲儒先生死節卷

危城經百戰幕下得真儒冰蘖存孤操風雲入壯圖奇
功方破敵大節竟捐軀稟稟餘生氣千秋激懦夫

題天童寺朝元閣

海內兵塵已十年上方鐘鼓獨依然史臣錫號承天寵
中使函香出御筵山列九龍蟠紫翠樓開五鳳出雲烟

籃輿亦有登山約擬聽松風借榻眠

贈陳章甫

三十年前鬢未蒼曾陪宰相入鵷行解衣換酒尋常醉
躍馬看花取次忙亂後已非前日夢老來那復少年狂
黃冠野服新粧束穩把長竿釣海鄉

秋過弟鶴年書館夜話

弟兄惟我老宗族有君知萬里尚為客百年能幾時秋
清妨熟寐夜靜話貞期明日匆匆別還生兩地思

鶴年弟盡棄紈綺故習清心學道特遺楮帳資其
澹泊之好仍侑以詩

誰搗霜藤萬杵勻製成鶴帳隔塵氛香生蘆絮秋將老
夢說梅花夜未分枕上不迷巫峽雨牀頭常對剡溪雲
竹爐松火茶烟煖一段清貞盡屬君

題畫竹為董文中賦

雨過蛟龍起風生翡翠寒無人知苦節落日下長安

假日燕集呈席諸老

半生辛苦獨天知十載鄉關入夢思作郡正逢多事日
揮毫不及少年時青衫有淚多如雨白髮無情亂若絲
今日一樽諸老共臨風不醉復何辭
鶴年次兄愛理沙字允中正間進士仕翰林應奉

題九靈山房圖

戴叔能讀書處
時叔能避地明

夢裏家山十載違丹青咫尺是耶非墨池新水春還滿
書閣浮雲晚更飛張翰見機先引去管寧避亂久忘歸
人生若解幽棲意處處林止有蔽薇

題餘姚州判官葉敬常海隄遺卷

潮汐東來勢蹴天一隄橫捍萬家全陵遷谷變人誰在
海晏河清事獨賢曉日山川神禹跡秋風禾黍有虞田
河渠他日書成績應並宣房與代傳

題鍾秀閣

為東湖古鼎
銘長老作

檻外澄湖平不流窗間疊嶂屹將浮烟霞五色錦屏曉

風月雙清瑤鏡秋簷藹濃香吹法席芙蓉涼影蕩仙舟
結巢擬傍雲松住迴首朝簪愧未投

鶴年表兄吳惟善樊川人

寄武昌諸友

黃鵠山前漢水濱一時英俊總能文金釵佐酒年俱少
銀燭抄書夜每分鴈杳魚沈勞遠思狼貪羊狠絕前聞
兵戈故國知誰在日斷西南日暮雲

寄東海鶴年賢弟

鶴臯東望接三山海上羣仙日叩關虎守月爐丹煉就
龍吟霜匣劍飛還故園松菊餘三迳老屋烟霞恰半間

爲問林泉逃世者如公今有幾人閒

題扇寄友

拾得瀛洲月一輪冰紈初翦瑩無塵提攜不用深相憶
滿握清風卽故人

小遊仙

桂殿瓊樓露氣清吹簫者是董雙成無端又作人間夢
風雨蕭蕭雞亂鳴
河海無聲海月寒長鯨吸浪洞庭乾一聲鐵笛風雲動
人在危樓第幾欄

丁孝子傳

四明烏斯道撰

丁孝子名鶴年字鶴年西域人性狷介窮經博史尤工
於詩自其祖阿老丁公入中夏世爲顯官父職馬祿丁
官武昌縣最長有善政歿而就葬武昌後兵亂鶴年倉
卒奉母夫人走南徐世父家生母馮先避匿邑之東村
東村首難竟阻絕莫知之也餘十載母夫人歿鶴年又
避地明之定海聞父墓嘗爲盜發掘生母亦病死葬洪
道鄉俱不得往省視日夕憂悸且卻絕酒肉鹽酪示自
貶又二十載道旣通卽告牒還武昌至則別窳地樊山
窆父棺卜日襄事日已迫而淋雨十日不止鶴年先一
夕仰天悲泣拜雨中愿翌日雨止半日許終事竣至質

明密雲雖四塞雨則強不澍也及發引視窆而返雨傾瀉如故已而訪生母葬地村聚間村聚自兵不省何所自秋徂冬徧訊之終莫有知者鶴年無以措意惟作母主蚤莫拜前祈五旬浹有報拜至七日夜夢母氏出高堂中鶴年遽牽衣慟哭以慟而卽寤晨起鄰老有楊重者至云吾昨夢子之母氏堂宇間自內出以酒肉見賜三人內一人勿御也鶴年以夢母氏與鄰老同夢之夕又同所夢母氏堂宇在舊所居廢宅之西又同斯見母氏葬地睽兆也試卽其地與萊荒土物色之因具畚鍤偕往徘徊顧視見平陸土有陷下者鶴年意謂吾聞母

葬時無棺槨下輟土輒上覆丹板人與板朽腐盡乃爾茲始可啟而觀歟遂陳酒肉以祭祭畢斲其土骨果見板尙有松節土輒亦具在良是矣然恐他墓偶有同者復嚙血骨上以試良久拭去血骨通變茜色可驗母一齒當正中如漆視之益驗時四人享祭餘鶴年不入口又與鄰老無少爽乃收骨棺斂葬是鄉慈母王墓在寒溪塘併加封樹鶴年就廬於父墓將終其身論曰子盡禮於父母固人所當爾至感夫高遠幽冥而驗焉者非精誠之心涉至難而罔渝者弗能也予考史冊方多古少今孰意鶴年桀然處頑薄之中爲人之所

獨也彼高遠幽冥且足以感之又豈不能感諸人乎嗚呼何其偉哉

詩曰丁鶴年精誠之心上達九天丁鶴年精誠之心下達九泉先翁曾長武昌縣死葬山中厄兵變山中父老懷甘棠修築堂封自相勸鶴年避亂東海頭年深道阻生煩憂亂靖還尋武昌路淚痕滴滿先翁正彷徨改葬樊山側不惜黃金換沙石此身尚在天地間何事能令慰朝夕卜日已定雨漫漫十日不止難下棺仰首呼天雨中拜雨爲閣住陰雲端葬後倉皇下山去大雨依然大如注是時送葬紛如雲祭奠爭趨墓邊路母困干戈

生別離兒大母死才得歸但聞母死葬村落問人葬地俱不知村落蓬蒿暗荒土數月走尋心獨苦焚香祝母如有靈爲報沈淪在何許夢中忽見別時容步上高堂言未終牽衣慟哭自驚覺清晨起接鄰家翁翁言昨夜夢而母親出房權贈尊酒夢間此夕精靈通蚤晚應當見枯朽共披荆棘凌風霜平地有坎疑有藏酒飯陳辭屬深土遺骸果見生輝光恐認他人心跪覩嚙血淋漓試枯骨枯骨通紅知可徵一齒當門正如漆重製衣冠新作墳遷葬母骨安母魂積恨誰知滿胸臆烈風頓掃空中雲丁鶴年病且癯何異常人七尺軀丁鶴年能讀

子
善何人不解探玄珠一片精誠獨如此回首世人空有

